

## **Si-vin'-omana Ioni Wayahina**

### *Buki Taina Wayahina*

Buki taina a tau ginuma ana wawa Ioni. Ka tomotau habuhabui ivitumahanei Ioni taina vi-vane Iesu a tau hae ananina, ka Sebedi natuna, ka Iamesa vaneina. Tauna mani buki ginumi imamaei, *Iesu Vaneana Ahiahina Ioni Wayahina*, ka *Ioni Ya Iginuma Naona*, ka *V'-inuana*, ka *V'-itonuna*.

Ka yana buki taina nihenina dewa habuhabui a pai nau-yehata wayahi kana-iavi. Ka buki taina nihenina pai mini habuhabui imamaei, ka aitonu wayahia taina. (1) Bagibagi goyogoyona ipaipaisewa tanopi taina wayahina, ka dewaia ai pata tau ekalesia ivitavitaka, ka kadu ai pata inau-vi-anigika. (2) Iesu Tau Ito-yavuha vi-vane Kauvea, ka tuta tepakaia wayahina aituhu aviyaivia Yaubada inau-haviei, Iesu tomotau vi-peui. Ka aituhu avi bagibagi Yaubada ivi-hahaiei, Iesu kadu dewaia habuhabui vi-peui. (3) Aituhu aviyaivia ihidahida ananina iuna Yaubada ivi-ateteyei, o aituhu aviyaivia ianiga iuna Yaubada yana vona ivi-munie, aituhu eha yai vitumahana ivo-haini, apaina tau habuhabui dewa ahiahina ivaniahei tauna wayahina. Buki taina ana pata nua-vaniaha na-veneka, ka kadu ana pata na-ivaiteka katoha-vi-anaika vita tunina ai tuta nihenia.

### *Pai Vi-putu*

<sup>1</sup> Buki taina nihenina Iesu Tau Ito-yavuha tauna nua-uya si-vin'-omanei. Tauna nua-uyana vaniahei Yaubada wayahina, ka Yaubada ya nuanua tauna dewa habuhabui tuta eha ani-hoina na-iakwa wayahina ivin'-omo na-si-vin'-omanei, e ya tau paisewa ai vin'-omana in'-anamanei. Ka Iesu yan' anelose nua-uyana venei, e vi-tunei omo ya tau paisewa ana wava Ioni wayahina. ✧

<sup>2</sup> Ka yauke Ioni-nana avaha dewaia habuhabuna adueyei ahaeyei buki taina nihenina. Ka de-waia vivane Yaubada yana vona kadu Iesu Tau Ito-yavuha yana hae.

<sup>3</sup> Aituhu aviyaivia apa-taputapu taina ina-iavi, e mani tomotau ina-nononi, ka aituhu aviyaivia vona taina inononi inua-vi-anai, ivi-ateteyei, akanai tau habuhabui nau-iaiava ivaniahei. Iuna tuta eha ani-hoina na-iakwa wayahina, de-waia tanoi ai tuta in'-omo. ✧

<sup>4</sup> Yauke au wava Ioni, ka leta taina aginumi ava-tawanei omomo ekalesia ai yau 7 papani Asia nihenina wayahimia. Ka yau nuanua am-venena awawaehina kadu nua gomagomanina uvaniahei Yaubada wayahina. Tauna mamaei ataina, ka mamaei nonova, ka apaina na-omo. Kadu yau nuanua am-venena awawaehina kadu nua gomagomanina uvaniahei nua ai yau 7 wayahia. Tau Yaubada ya pai manuena ahihi-vainena matana imamaei. ✧

<sup>5</sup> Ka kadu yau nuanua am-venena awawaehina

---

✧ **1:1:** SiV 22:6. ✧ **1:3:** SiV 22:7, 10. ✧ **1:4:** NiT 3:14-15; SiV 3:1; 4:5.

kadu nua gomagomanina uvaniahei Iesu Tau Ito-yavuha wayahina. Tauna tau hae tunutunuhina, ka kadu tauna onoto naona anigea mini-havine-vavaha, ka kadu tauna tanopi ana kiniV habuhabui ai tau veimea. Tauna dewa-vidovidoheka, ka dayahina wayahina ito-yavuhika yaka dewa goyona wayahia. ✧

<sup>6</sup> Ka kadu tauna vo-vineka, e tuta ataina wayahina tauna yaka kiniV, kadu itoka avaha kavi-tau vi-nomu, ka tauna ya Yaubada kadu Amana wayahina kapaipaisewa. Wayahina, tauna nau-wawani didigana kadu bagibagina ima'-vavaha. Ana pata deina. ✧

<sup>7</sup> Udueyei! Apaina tauna wahuma na-opu-me you nihenina, e tomotau habuhabui tanopia idueyei. Ika, kadu tomotau nonova tanopia imamaei ka baimina itonei apia wayahina idueyei. Ka auyewana wayahina tau ma' tanopi papani tunina tunina wayahia imamaei ivi-mohai, iuna tauna ya vin'-omana wayahina. Akanai! Ana pata deina. ✧

<sup>8</sup> Yaka Kauvea Yaubada ivona, “Yauke Pai Vi-putu kadu Pai Nau-yehata. Tuta ataina wayahina amamaei, ka nonova amamaei, ka apaina an'-omo. Yauke Bagibagi-vaineu.” ✧

<sup>9</sup> Yauke vaneimi Ioni. Avaha kavi-yoko aita-moata Iesu nihenina, ka avaha tauna ya pai veimea kavaniahei, ka habuhabuka avaha in-ahe kavaniahei, ka kadu avaha katoha-vi-anaika tauna wayahina. Nonova Yaubada yana vona

---

✧ **1:5:** Kol 1:18; Sam 89:27. ✧ **1:6:** 1Pi 2:9; SiV 5:10; 20:6. ✧ **1:7:** Dan 7:13; Sek 12:10; Mat 24:30; Ioni 19:34-37; 1Te 4:17. ✧ **1:8:** SiV 21:6; 22:13.

anaunau-waheyei kadu Iesu yana hae ahae-haeyei. Wayahina, iyohoniū iomaneu bonabona ana wava Patimosi wayahina amamaei.

<sup>10</sup> Ka yaka Kauvea yan' auyewa tapanono wayahina Nuana Ahihinata nau-vi-anaiu, e mu-niua movina ananina anononi ka movina a nonona bwegigi vonavona deina,

<sup>11</sup> ka ivona, “Nau-wawanim dewaia habuhabui apaina edueyei pai nunuma nihenina eginumi, ka pai nunumana eva-tawanei omo ekalesia ai yau 7 wayahia, vivane meagai Epesusi wayahina, ka meagai Simurina wayahina, ka meagai Perigamum wayahina, ka meagai Tiatira wayahina, ka meagai Saridisi wayahina, ka meagai Piladelipia wayahina, ka kadu meagai Laodisea wayahina.”

<sup>12</sup> Wayahina, amagigino, e tauna ipuipupu wayahiua adueyei. Ka avaha amagigino, akanai lampaV a pai vi-ai ai yau 7 adueyei, ka lampaV a pai vi-ai-naia a vevewana goulaV wayahina ivevewanei.

<sup>13</sup> Ka niwania aitam onoto mimini adueyei ana dune itoka tomotau tupwana deina. Ka ana kwama avanana wayahina iopu a itoava aena wayahina, ka manakadana awaniana a haiona goulaV weteweteni. ✧

<sup>14</sup> Ka unununa kadu apanana ainua kavukavu-vainena, tui vovouna deina, ka matana ai dune ai yabeyabena deina. ✧

<sup>15</sup> Ka aena a maheta vo-vi-namanamani, kainumu ana wava bironeseV vovouna ibou anai deina, ka movina a nonona ananina, daudau anani itaitaina deina.

---

✧ **1:13:** Dan 7:13; 10:5. ✧ **1:14:** Ese 43:2; Dan 7:9; 10:6; SiV 2:18; 19:12.

16 Ka wadima ai yau 7 nimana ateina si-nai, ka awana wayahina inama manimaninina iomo, ka inamana nihona ainua. Ka tepana a maheta ani-vainena, babau vanavana auyewa deina. ✧

17 Ka avaha tauna adueyei, akanai aena apeu au dune avaha aniga deina. Ka tauna nimana ateina wayahiua boui, e ivona,

“Eha ematamatauta. Yauke Pai Vi-putu kadu Pai Nau-yehata. ✧

18 Yauke Tau Ma'-vavaha ka Yawayawaiu. Nonova aniga, kate edueyei! Yauke ama'-vavaha! Ka Aniga kadu HadesiV ainua aveimeyei, ka yauke awaei, kadu abou-potei.

19 Akanai. Ka aviani avaha aviwavenem edueyei, nau-wawanim eginumi aitamoata deina. Ika, aviani avaha edueyei, ka aviani tuta ataina wayahina mamaei, ka kadu aviani apaina in'-omo, dewaia eginumi-neiei.

20 Dewa hivahivai ai anamana taina. Wadima ai yau 7 nimau ateiuu edueyei vivane anelose ai yau 7 ekalesia ai yau 7 wayahi. Ka kadu lampaV ai pai vi-ai ai yau 7 edueyei vivane ekalesia ai yau 7.”

## 2

### *Anelose Meagai Epesusi Wayahina Yana Leta*

1 Ka ivona, “Ekalesia meagai Epesusi wayahina an' anelose wayahina vona taina eginumi.

‘Vane taina neine taua wayahiua. Wadima ai yau 7 nimaua ateiuu asi-nai aveimeyei, ka kadu

---

✧ **1:16:** Ebe 4:12; SiV 2:12; 19:15. ✧ **1:17:** Isa 44:6; 48:12; SiV 2:8; 22:13.

lampaV ai pai vi-ai ai yau 7 goulav niwania  
ani-awana. ✧

<sup>2</sup> Avaha yam dewa, ka yam paisewa toy-  
oina, ka kadu yam gwahea anamanei. Ka  
kadu avaha anamanem tomotau goyogoyoi yai  
dewa enau-nikonikoiei. Ika, tupwai tomotau  
ivona-vanevane tau au tau hae anani, kate  
wamke avaha enau-dadani, ka avaha evaniahei,  
tau tau vitupu. ✧

<sup>3</sup> Ka eanamaneu, ka tutana mani tomotau  
inau-nikonikoieu, wamke au wava esi-nai, ka  
avaha inahe evaniahei tomotau-naia wayahia.  
Ka vatum wayahina egwagwaheyei, ka eha  
eta-ihanua. Yam dewaia habuhabui tanoi ahi-  
ahina mataua.

<sup>4</sup> Kate yam dewa aitam eha yau nuanua, vivane  
yam dewa-vidovidoha naona wayahiu evo-haini.

<sup>5</sup> Wayahina, nau-wawanim aveta nonova  
hetana emamaei enuani. Iuna avaha epeu  
eopu! Ka nau-wawanim enua-vinana, ka  
emavi-havine yam dewa naona wayahia, e  
ededewei deina. Aituhu eha enua-vinana, akanai  
yauke an<sup>l</sup>-omo wayahima, e yam lampaV a pai  
vi-ai an<sup>l</sup>-epa-yavunei. ✧

<sup>6</sup> Kate aitam yam dewa ededewei ivaitem,  
vivane Nikolaitani yai yoko yai dewa  
enau-nikonikoiei. Ika, yauke kadu yai dewa  
anau-nikonikoiei.’ ”

<sup>7</sup> “Aituhu aviyaivia yai nuanua vona taina  
Nuana Ahihinata wayahina inononi, akanai  
yau nuanua vona taina iomomo ekalesia  
wayahia ina-nua-hau. Aituhu aviyaivia

---

✧ 2:1: SiV 1:16. ✧ 2:2: 1Io 4:1. ✧ 2:5: SiV 3:3.

vitaia ivane-tawanei, akanai yauke tomotau  
an'-awaehei yawai-vavaha an' ai uana  
in'-aniaia, ka ai-nana Yaubada ya pai ma'  
ahihi-vainena nihenina mimini-vavaha.” ☆

*Anelose Meagai Simurina Wayahina Yana Leta*

<sup>8</sup> Ka ivona, “Ekalesia meagai Simurina  
wayahina an' anelose wayahina vona taina  
eginumi.

‘Vane taina neine taua Pai Vi-putu kadu Pai  
Nau-yehata wayahiua. Avaha aniga kadu  
avaha amini-havine, e yawayawaiu amamaei.

<sup>9</sup> Avaha anamanem vita ananina evaniahei  
kadu wamke tau payapayaya. Kate avonem,  
taum tau kaikaiwabo mataua! Ka tupwai tomo-  
tau ivonavona tau me Iudea, kate tau tau vitupu.  
Vona ahiahina, tau Satana ya tau awa-dava, ka  
iapa-goyoyoem. ☆

<sup>10</sup> Ka avonem, inahe in'-omo wayahima, kate  
eha ematamatauta dewaia wayahi. Vona ahi-  
ahina, apaina Satana tupwami na-poy'-avinimi  
na-yohoyohonimi, e manua yohona nihenina  
na-bounimi. Ka dewaia inau-dadanimi. Ka dewa  
manimaninina uvaniahei a itoava auyewa ai yau  
10 ina-iakwa wayahina. Nau-wawanim yam  
vitumahana enua-vi-anai a itoava inahe-naia  
ina-iakwa wayahina. Ika, aituhu inau-vi-anigim,  
akanai nau-wawanim yauke wayahiu emimini  
toyoina. Aituhu yam vitumahana epoy'-avini  
deina, akanai yawai-vavaha a kunu-nabanaba  
avenem eweteni.’ ” ☆

☆ **2:7:** Nao 2:9; SiV 22:2, 19.

☆ **2:9:** 2Ko 11:14-15; SiV 3:9.

☆ **2:10:** 2Ti 4:8; Iam 1:12.

11 “Aituhu aviyaivia yai nuanua vona taina Nuana Ahihinata wayahina inononi, akanai yau nuanua vona taina iomo ekalesia wayahia ina-nua-hau. Aituhu aviyaivia vitaia ivane-tawanei, akanai tau abou-potai aniga v'-inuana wayahina, ka anigana wayahina eha aitam aviani ivaniahe.” ☆

*Anelose Meagai Perigamum Wayahina Yana Leta*

12 Ka ivona, “Ekalesia meagai Perigamum wayahina an' anelose wayahina vona taina egin-umi.

‘Vane taina neine taua wayahiua. Yauke yau inama manimaninina kadu nihona ainua.

13 Avaha yam meagai anamanei. Ika, Satana ya pai manuenta ananina mamaei wayahima. Tauna mamaei, kate wamke evi-muni-waiwaieu. Ka tuta nonova wayahina, yau tau paisewa ahiahina ana wava Anitipasi inau-vi-anigi yam meagai nihenina. Ika, Satana mamaei yam meagai nihenina. Ka tutana Anitipasi inau-vi-anigi, eha yam vitumahana wayahiua eta-vo-haini. Yam dewaia taina ahiahina.

14 Kate yam dewa tupwai eha yau nuanua deina. Tupwai tomotau yam meagai nihenina Balaam ya viwavenena goyona iawaehei kadu ivi-munie. Tuta nonova wayahina tauna Balaka viwavenei aituhu tau aniani ivi-nomu yai yaubada vitupu wayahia, e aituhu me Isiraeli aninina iania, ka aituhu munia ikenekenene, akanai dewa goyogoyoi idedewei Yaubada

---

☆ 2:11: SiV 20:14; 21:8.



matana deina. Ka munia, Balaka ana pata na-vita-vovoni. ✧

<sup>15</sup> Ka kadu tupwai yam meagai nihenina Nikolaitani yai yoko yai viwavenena goyona ivi-munie.

<sup>16</sup> Wayahina, nau-wawanim enua-vinana. Aituhu eha enua-vinana, vona ahiahina, tuta eha ani-hoina na-iakwa wayahina an'-omo wayahima, e tau i dedewe deina wayahia anau-havia inamana awaua vin'-omo wayahina.' ”

<sup>17</sup> “Aituhu aviyaivia yai nuanua vona taina Nuana Ahihinata wayahina inononi, akanai yau nuanua vona taina iomo ekalesia wayahia ina-nua-hau. Aituhu aviyaivia vitaia ivane-tawanei, akanai aniani hivahivana ana wava manaV avenei. Ka kadu hanu kavukavuna avenei, ka hanu-naia hetaia ai wava vovouna mamaei. Ka tau ai heta hanu-naia ivaniahei wava-naia in'-anamanei, eha mani tomotau.” ✧

### *Anelose Meagai Tiatira Wayahina Yana Leta*

<sup>18</sup> Ka ivona, “Ekalesia meagai Tiatira wayahina an' anelose wayahina vona taina eginumi.

‘Vane taina neine taua Yaubada Natu-hoina wayahiua. Matau ai dune ai yabeyabena deina, ka kadu aeu ai dune vo-vi-namanamani kainumu bironeseV vovouna deina. ✧

<sup>19</sup> Wamke yam dewa habuhabuna, ka yam dewa-vidovidoha, ka yam vitumahana, ka yam paisewa, ka kadu yam gwahea anamanei. Ka vona ahiahina, tuta ataina wayahina yam dewa

---

✧ **2:14:** Yau 22:1-25:3; 31:16; 2Pi 2:15. ✧ **2:17:** NiT 16:4, 14-15, 33-34; Ioni 6:48-50; Isa 62:2. ✧ **2:18:** SiV 1:14-15.

ividoha, ka yam dewa naona ivane-tawanei. Ahiahina.

<sup>20</sup> Kate yam dewa aitam eha yau nuanua deina. Iuna wamke aitam vavine ai wava Iesibeli eawaehei. Vavinena tomotau ivonevonei, ivonavona, “Yauke aitam tau apa-taputapu”, ka yai viwavenena goyona wayahina yau tau paisewa ieta-naonaoi ivenau-panipani ikenekenene, kadu yaubada vitupu ai aniani ianiana. ✧

<sup>21</sup> Ka avaha tuta ahiahina awaehei vavine-nana yai dewaia goyogoyoi wayahia inua-vinana, kate eha yai nuanua, wayahina ivihahaieu.

<sup>22</sup> Wayahina, vavine-nana an'-onei inahe a pai dauva hetana. Ka aituhu aviyaivia iomomo, e vavine-nana nui ikenekenene, ka aituhu dewaia wayahia eha inua-vinana, akanai inahe ani-vainena ivaniahei wayahiua.

<sup>23</sup> Ka kadu natunatui muya wayahina anau-vi-anigi. Na-iakwa, e tau ekalesia habuhabui in'-anamaneu vivane yauke tomotau habuhabui nuai nihenina adudueyei, ka kadu yai nuanua anamane-yehai. Ka apaina tau ekalesia aitamoata aitamoata wayahimia, anau-patami itomi yami dewa nau-wawani deina. ✧

<sup>24</sup> Ka itomi me Tiatira tupwami tunimi, ka itomi eha vavine-nana yai viwavenena uta-vi-munie, ka kadu eha Satana ya nua-uya hivahiva-vainei ut'-anamane. Tomotau nua-uyana ivi-wahani “dewa hivahiva-vainei”, kate avonemi, dewaia vivane vitupu ana noe. Akanai, itomi ahiahimi

✧ **2:20:** 1Ki 16:31; 2Ki 9:22. ✧ **2:23:** Sam 7:9; Ier 17:10; SiV 20:12-13.

wayahimia avona deina. Eha kadu aitam vita hetamia aboui.

<sup>25</sup> Itomi nau-wawanimi avi dewa ataina wayahimia, akanai dewaia udedewei, ka umimini toyoina a itoava an'-omo wayahimi wayahina.' " ✧

<sup>26</sup> "Aituhu aviyaivia vitaia ivane-tawanei, ka aituhu aviyaivia yau nuanua idedewei a itoava auyewa pai nau-yehata wayahina, akanai

apaina tomotau bagibagi avenei,  
e tau tomotau papani habuhabui nihenia  
iveimeyei. ✧

<sup>27</sup> 'Apaina tauna yau tomotau veimeyei,  
ka ya pai veimea vivane toyoina  
kainumu deina,  
ka tauna ana pata na-tutu-guaguani  
kunia deina.'

Yauke avaha yau bagibagi avaniahei Amau wayahina. Ka apaina yau tomotau yai bagibagi ivaniahei yauke wayahiua aitamoata deina.

<sup>28</sup> Ka kadu ubwana avenei. ✧

<sup>29</sup> Aituhu aviyaivia yai nuanua vonana Nuana Ahihinata wayahina inononi, akanai yau nuanua vonana iomo ekalesia wayahia ina-nua-haii."

### 3

#### *Anelose Meagai Saridisi Wayahina Yana Leta*

<sup>1</sup> Ka ivona, "Ekalesia meagai Saridisi wayahina an' anelose wayahina vona taina eginumi.

'Vane taina neine taua wayahiua. Yaubada nuana ai yau 7 kadu wadima ai yau 7 nimaua asi-nai aveimeyei. Yam dewa anamanei. Mani tomotau inuanua wamke yawayawaim, kate am anamana tanoi vitupu. Wamke aninigam.

☆

<sup>2</sup> Wayahina, nau-wawanim emini, e yawaim evo-vinei! Aituhu avi dewa ahiahina iaihanua imamaei wayahima a itoava tuta ataina wayahina, ka aituhu avi dewa ahiahina tuta eha ani-hoina na-iakwa wayahina in'-aniga, akanai wamke nau-wawanim dewaia evo-vi-bagibagi. Iuna yam dewa habuhabui eha tunuhina yauke yau Yaubada matana wayahina.

<sup>3</sup> Wayahina, nau-wawanim aviani avaha enononi kadu aviani avaha evaniahei enuani. Ka nau-wawanim enua-vinana, ka vonaia evi-ateteyei. Aituhu eha emini, akanai apaina an'-omo wayahima tau vainau aitam deinake, ka eha am pata yau vin'-omana a babau en'-anamane. ☆

<sup>4</sup> Ka wayahima tomotau aitonuata imamaei, ka tau i eha ai kwama ita-vo-vi-gawami. Wayahina, apaina tau i yauke nui avenavenau kwama kavukavuna wayahina. Iuna tau i yai dewa ai nau-pata tunuhina ivaniahei deina.'” ☆

<sup>5</sup> “Aituhu aviyaivia vitaia ivane-tawanei, akanai kwama kavukavuna ivaniahei iweteweteni tomotau i deina. Ka tuta tepakaia wayahina, eha ai wava akweu Yawai-vavaha ana Buki wayahina. Ka Amau matana kadu tauna

---

☆ **3:1:** SiV 1:4, 16. ☆ **3:3:** Mat 24:43-44; SiV 2:5; 16:15; 1Te 5:2.

☆ **3:4:** Iud 23.

yan' anelose mataia yauke an'-awaehei tau  
vivane yau tomotau. ✧

<sup>6</sup> Aituhu aviyaivia yai nuanua vonana Nuana  
Ahihinata wayahina inononi, akanai yau nuanua  
vonana iomo ekalesia wayahia ina-nua-hau.”

*Anelose Meagai Piladelipia Wayahina Yana  
Leta*

<sup>7</sup> Ka ivona, “Ekalesia meagai Piladelipia  
wayahina an' anelose wayahina vona taina  
eginumi.

‘Vane taina neine taua ahihiuata kadu  
tunutunuhiu wayahiua. KiniV Davida ya  
pai yavuha wayahiua mamaei. Wayahina,  
yauke Yaubada ya pai veimea aveimeyei. Ka  
aituhu aviani yauke awaei, eha aitam koiaka  
ana pata na-bou-pote. Ka aituhu aviani yauke  
abou-potei, eha aitam koiaka ana pata na-wae.  
✧

<sup>8</sup> Wamke yam dewa anamanei. Edueyei,  
yauke awa-pota tepama awae-vavahi, ka  
eha aitam koiaka ana pata na-bou-pote.  
Vona ahiahina, bagibagi kikituna ana heta  
wayahima mamaei anamanei. Ika eihanua,  
kate tuta nonova wayahina a itoava tuta ataina  
wayahina yau vona evi-ateteyei, kadu eha au  
wava evi-ebue. ✧

<sup>9</sup> Wayahina, apaina am havia  
anau-vi-nehanehai in'-omo, e aem ivi-tupa-gum,  
kadu anau-vi-nehanehai in'-awaehei taum  
adewa-vidovidohem. Tau i vonavona tau me

✧ **3:5:** NiT 32:32-33; Mat 10:32; Luk 12:8. ✧ **3:7:** Isa 22:22.

✧ **3:8:** 1Ko 16:9.

Iudea, kate tau tau vitupu. Tau vivane Satana ya tau awa-dava akanai. ✧

10 Nonova am veimea avenem, vivane nau-wawanim vatum wayahina etoha-vi-anaim. Ka avaha veimea tanoi evi-ateteyei tunuhina. Wayahina, apaina nau-dadana ananina na-omo tau ma' tanopi habuhabui wayahia, kate abou-potam, eha evaniahe akanai. ✧

11 Tuta eha ani-hoina na-iakwa wayahina amavi-havine. Wamke nau-wawanim aviani tuta ataina wayahina wayahima mamaei, dewaia evo-vi-avini. Aituhu eha, ana pata mani tomotau in'-omo, ka am kunu-nabanaba (vivane didigam) in'-epe.' ”

12 “Aituhu aviyaivia vitaia ivane-tawanei, akanai yauke avo-vinei ivi-ohona ananina yauke yau Yaubada ya Manua Vito-pota nihenina. Ka tuta tepakaia wayahina eha ini-tawane. Ka kadu yauke yau Yaubada ana wava tomotau ininia aginumi. Ka kadu yau Yaubada ya meagai ana wava ininia aginumi. Apaina meagai-nana wahuma na-opu-me yau Yaubada wayahina, ka meagai-nana ana wava Ierusalem Vovouna. Ka kadu yauke au wava vovouna ininia aginumi. ✧

13 Aituhu aviyaivia yai nuanua vonana Nuana Ahihinata wayahina inononi, akanai yau nuanua vonana iomo ekalesia wayahia ina-nua-hau.”

### *Anelose Meagai Laodisea Wayahina Yana Leta*

---

✧ 3:9: SiV 2:9. ✧ 3:10: Luk 21:19; 2Ti 2:12. ✧ 3:12: Isa 62:2; 65:15; SiV 14:1; 21:2.

14 Ka ivona, “Ekalesia meagai Laodisea wayahina an' anelose wayahina vona taina eginumi.

‘Vane taina neine taua wayahiua. Yauke au wava Ana Pata Deina Yaubada ya Vona-dabadaba wayahi. Yauke yau hae tunutunuhina kadu yau vona tunutunuhina ana noe. Ka Yaubada ya vevewana habuhabuna ivin'-omo yauke taua wayahiua.

15 Avaha yam dewa anamanei. Wamke eha genanavim, kadu eha tutumim. Ia! Yau nu-anua aitam wayahia evi-nua-dadani! ✧

16 Ika, yam dewa eha genanavina kadu eha tutumina. Wayahina, tuta eha ani-hoina na-iakwa wayahina awaua aiwana-yavunem akanai.

17 Wamke evonavona, “Yauke avaha avi-tau kaikaiwabo. Avaha gugua habuhabuna wayahiua anau-gwaugwau akanai. Wayahina au pata.” Evonavona deina, kate eha et'-anamane, yauke mataua wamke naunau-yogum, ka goyogoyom, ka nau-wawanim ate-nuanuai evaniahei, ka matam goyogoyona, ka kadue wamke nagonegonem. ✧

18 Wayahina, amataedam nau-wawanim wayahiua yau goulata hadahadanina ai ananata wayahina evi-maiei. Na-iakwa, evi-tau kaikaiwabo-hoim. Ka kadu nau-wawanim kwama kavukavuna wayahiua evi-maiei eweteni. Na-iakwa, nagonegonem ka am ini-yauyau ebwaei deina. Ka kadu nau-wawanim munamuna wayahiua evi-maiei

---

✧ 3:15: Rom 12:11. ✧ 3:17: 1Ko 4:8; Luk 12:21.

matam enau-munemunei. Na-iakwa, matam ividoha, am pata edunedune. ✧

<sup>19</sup> Aituhu aviyaivia adune-nuanuaiei, akanai yai dewa goyona asi-vin'-omanei, ka vona panina wayahia anau-vi-avini kadu avo-vi-tunuhi. Wayahina, wamke nau-wawanim yau vonana enononi ahiahina kadu enua-vinana. ✧

<sup>20</sup> Edueyei. Baina yauke amimini awa-pota wayahina atutu-keakeana kadu ahonehone. Ka aituhu aviyaivia moviu inononi, ka aituhu awa-pota iwaei, akanai yauke anu-me, e nui an'-am, e munia tau in'-omo wayahia, e nui an'-am.' ” ✧

<sup>21</sup> “Aituhu aviyaivia vitaia ivane-tawanei, akanai yauke an'-awaehei yauke nui yau pai manuenta ahihi-vainena hetana kamanuenta. Vona ahiahina, nonova yauke vitai habuhabui avane-tawanei. Iakwa, e yauke Amau nui tauna ya pai manuenta ahihi-vainena hetana amanuenta aitamoata deina.

<sup>22</sup> Aituhu aviyaivia yai nuanua vonana Nuana Ahihinata wayahina inononi, akanai yau nuanua vonana iomo ekalesia wayahia ina-nua-hai.”

## 4

### *Me Wahuma Iaiwaodu Yaubada Wayahina*

<sup>1</sup> Dewaia habuhabui tanoi iakwa, e adunedune, e tepaua aitam awa waewaena wahuma adueyei. Ka kadu movi-nana naona anononi wayahia ipuipupu bwegigi deina, movi-nana ivona, “Baina evane-me, e avi dewa nau-wawani

---

✧ **3:18:** Isa 55:1. ✧ **3:19:** 1Ko 11:32; Ebe 12:6; SiV 2:5. ✧ **3:20:** Ioni 14:23.



apaina ivin<sup>l</sup>-omo, dewaia aviwavenem edueyei.”

✧

<sup>2</sup> Ka tuta aitamoata wayahina Nuana Ahihi-nata epau avane wahuma. Ka tepaua aitam pai manuena ahihi-vainena adueyei, ka aitam koiaka hetana manuena. ✧

<sup>3</sup> Ka tauna manuena ana dune vivane yabebenina, hanu ahihina ainua deina, vivane iasiperaV ka karinelianiV. Ka pai manuena awaniana aitam boa mini-vivini, ana dune ananawina, hanu aitam ana wava emeralidaV deina. ✧

<sup>4</sup> Ka pai manuena ahihi-vaine-nana awaniana kadu mani pai manuena ai yau 24 ima<sup>l</sup>-vivinei, ka onotoi anani ai yau 24 hetaia imanuenta. Tau ai kwama kavukavuna, ka ununua ai kunu-nabanaba goulav iweteweteni. ✧

<sup>5</sup> Ka pai manuena ahihi-vaine-nana wayahina dewa ivin<sup>l</sup>-omo-nananena, vivane vonaina, ka dududui, ka anitana. Ka kadu pai manuena ahihi-vaine-nana tepana lampaV ai yau 7 iyabeyabena, vivane Yaubada nuana ai yau 7. ✧

<sup>6</sup> Ka kadu pai manuena ahihi-vaine-nana tepana aitam amane mamaei, ana dune navu gelasi deina, ka mahemaheina, wei deina.

Ka amanena nihenina ka kadu pai manuena ahihi-vaine-nana awaniana vahitau yawayawai na nau-punina imini-vivinei. Ka matai habuhabui inini ibwaei, akanai tepaia kadu munia. ✧

<sup>7</sup> Ka vahitau yawayawaina naona ana dune lioniv deina, ka v<sup>l</sup>-inuana ana dune bulumakav

---

✧ **4:1:** SiV 1:1, 10. ✧ **4:2:** Isa 6:1. ✧ **4:3:** Ese 1:28. ✧ **4:4:** SiV 3:18. ✧ **4:5:** Ese 1:13; Sek 4:2; SiV 1:4; 8:5; 11:19; 16:18. ✧ **4:6:** Ese 1:5-10, 22; 10:14.

deina, ka v'-itonuna tepana onoto tepana deina, ka vi-nau-punina ana dune manubada yaveyaveha deina.

<sup>8</sup> Ka vahitau aitamoata aitamoata papei ai yau 6, ka matai habuhabui awaniai ibwaei, kadu matai papei ibwaei, vivane hetaia kadu ipuia. Ka tuta habuhabuna wayahina, ika auyewa kadu ioyoma, vahitau-naia ivonavona,

“Ahihinata, ahihinata, ahihinata!

Kauvea Yaubada Bagibagi-vavaha ahihinata.

Tauna nonova mamaei,

ka ataina mamaei,

ka kadu tuta tepakaia wayahina na-omo.” ☆

<sup>9</sup> Ka avi tuta vahitau-naia yawayawai Tau Ma'-vavaha pai manuena ahihi-vainena hetana manuena iawa-davedavei, o avi tuta iapa-vidovidohei, o avi tuta inau-kaiwei,

<sup>10</sup> akanai, onotoi anani ai yau 24 ivi-tupa-gum tauna matana, ka kadu tau Tau Ma'-vavaha iawa-davedavei. Ka tau ai kunu-nabanaba goulav iepei, ka pai manuena ahihi-vaine-nana matana ibou-opuei, ka ivonavona, ☆

<sup>11</sup> “Wamke yama Kauvea kadu yama Yaubada,

ka nau-wawaniai didigam avo-vi-natei,

ka awa-davedavem,

ka kadu wamke nau-wawanim

bagibagi evaniahei.

---

☆ **4:8:** Isa 6:2-3; Ese 1:18; 10:12. ☆ **4:10:** SiV 7:10; 19:4.

Iuna wamke dewa habuhabuna evevewanei.  
 Taum am heta yam nuenuea evevewanei,  
 ka tau i mamaei kadu tau yawai  
 ivin'-omo taum am heta wayahima.”

## 5

### *Pai Ginuma Nunumina*

<sup>1</sup> Ka tauna pai manuena ahihi-vaine-nana hetana manuena nimana ateina nihenina pai ginuma nunumina adueyei. Ka iginuma mamaei nihenina kadu upuna, ka pai bou-pota ai yau 7 ibou-potei. ✧

<sup>2</sup> Ka aitam anelose bagibagina adueyei, ka tauna movina ananina vivi-hone, vi-tanatanai, “Koiaka Yaubada awaehi pai bou-pota taina na-bwege-yavunei, e pai ginuma nunumina na-yaveni?”

<sup>3</sup> Kate eha aitam koiaka ana pata. Tau ma' wahuma, ka tau ma' tanopi, ka kadu tau ma' tanopi nihenina eha ai pata pai ginuma nunumina iyaveni. Tai eha ai pata nihenina idune-nuie.

<sup>4</sup> Wayahina yauke anua-vita ananina kadu avi-mohai, iuna eha aitam koiaka ita-vaniahe ana pata pai ginuma nunumina na-yaveni o na-dune-nuie.

<sup>5</sup> Ka aitam ononotoi anani wayahia voneu, ivona, “Eha evi-mohai! Edueyei! Dede Iuda yai LioniV, vivane Davida Wanohina, vane-tawanei. Wayahina, tauna ana pata pai ginuma nunumina a pai bou-pota na-bwege-yavunei, kadu ana pata pai ginuma nunumina na-yaveni.” ✧

✧ **5:1:** Isa 29:11; Ese 2:9-10. ✧ **5:5:** Nao 49:9; Isa 11:1, 10; SiV 22:16.

<sup>6</sup> Ka pai manuenta ahihi-vaine-nana niwanina aitam LamiV mimini adueyei. Ka vahitau yawayawai na nau-punina kadu ononotoi anani ai yau 24 imimini-vivinei. Ka Lami-nanaV ana dune vivane aviyaivia avaha inau-vi-anigi. Ka tauna tonana ai yau 7, kadu matana ai yau 7. Ka mata-nana vivane Yaubada nuana ai yau 7, ka Yaubada vi-tunei iomo tanopi habuhabuna wayahina, e ini-keyekeyei. ✧

<sup>7</sup> Ka Lami-nanaV omo, ka pai ginuma nunumina tauna pai manuenta ahihi-vaine-nana hetana manuenta nimana ateina wayahina epei.

<sup>8</sup> Ka avaha epei, e vahitau yawayawai na nau-punina ka ononotoi anani ai yau 24 nui ivi-tupa-gum Lami-nanaV matana. Ka aitamoaata aitamoata wayahia yai pai viam-toutou ipoy'-avini, ka kadu gaeba goulaV ipoy'-avini, ka pai mau dibidibina gaebaia nau-vi-anai, ka pai mau vivane tau ekalesia yai viana. ✧

<sup>9</sup> Ka ahe vovouna iaheahei, ivona,

“Vona ahiahina, wamke am pata  
 pai ginuma nunumina en'-epei,  
 kadu am pata a pai bou-pota  
 ebwege-yavunei eyaveni.  
 Iuna wamke avaha eawaehei  
 inau-vi-anigim,  
 ka dayahim wayahina tomotau evi-maiei  
 Yaubada wayahina.  
 Ka tomotau vivane dede  
 aitamoata aitamoata wayahia,

---

✧ 5:6: Sek 4:10; Ioni 1:36; SiV 13:8. ✧ 5:8: SiV 8:3-4; Sam 141:2.

ka movi  
     aitamoata aitamoata wayahia,  
 ka yoko  
     aitamoata aitamoata wayahia,  
 ka kadu papani  
     aitamoata aitamoata wayahia. ✧

<sup>10</sup> Ka evi-nua-dadani evevewanei-neiei  
     ivi-tau ma' wahuma  
         Yaubada ya pai veimea nihenina,  
 kadu evevewane-neiei ivi-tau vi-nomu  
     Yaubada wayahina.  
     Ka apaina tanopia iveimeyei.” ✧

<sup>11</sup> Ka adune-havine ka anelose habu-vainei  
 movi anononi, tau ai yau kaiwadi, 100,000,000  
 deina, o kadi ai vi-am 1,000,000 hetana.  
 Ka pai manuenta ahihi-vaine-nana ka  
 vahitau yawayawai, ka kadu ononotoi anani  
 imini-vivinei. ✧

<sup>12</sup> Ka tau i movi anani wayahia iahehe, ivon-  
 avona,

“LamiV taina inau-vi-anigi.  
     Ka tauna nau-wawani pai veimea,  
         ka gugua patai ani-vainena,  
     ka nua-uya, ka bagibagi,  
         ka apa-vidovidoha, ka didiga,  
     ka kadu yama awa-dava vaniahei!”

<sup>13</sup> Iakwa, e tau ma' wahuma habuhabui, ka tau  
 ma' tanopi habuhabui, ka tau ma' tanopi ipuna  
 habuhabui, ka tau ma' hawana habuhabui, ka

✧ **5:9:** Sam 96:1; 98:1. ✧ **5:10:** NiT 19:6; Isa 61:6; SiV 1:6; 20:6.

✧ **5:11:** Dan 7:10; Ebe 12:22.

vahitau habuhabui hawana nihenia imamaei nui  
iaheahe, anononi, ivonavona,

“Tauna pai manuenta ahihi-vaine-nana  
wayahina  
kadu Lami-nanaV wayahina  
ainua nau-wawani awa-dava,  
ka apa-vidovidoha, ka didiga, ka pai  
veimea  
ivaniahei tuta eha a ito-vewana  
wayahina.”

<sup>14</sup> Ka vahitau yawayawai na nau-punina ivona,  
“Ika. Ana pata deina.” Ka ononotoi anani  
ivi-tupa-gum iaiwaodu.

## 6

### *Pai Ginuma Nunumina A Pai Bou-pota Ai Yau 6*

<sup>1</sup> Ka yauke adunedune, e Lami-nanaV pai  
ginuma nunumina a pai bou-pota naona  
bwege-yavunei. Ka aitam vahitau yawayawai  
wayahia movina anitana deina anononi, ivona,  
“En<sup>l</sup>-omoi.” ✧

<sup>2</sup> Ka adunedune, ka tepaua aitam osiV  
kavukavuna mimini adueyei, ka a tau vi-ata  
nimana nau-havia a pwapwayovu poy<sup>l</sup>-avini. Ka  
tauna a kunu-nabanaba vaniahei, e vi-ata ine  
tau vane-tawane deina, ka ya nuanua papani  
habuhabuna vi-peui. ✧

<sup>3</sup> Ka Lami-nanaV pai ginuma nunumina a  
pai bou-pota v<sup>l</sup>-inuana bwege-yavunei. Ka

---

✧ **6:1:** SiV 4:6; 5:1. ✧ **6:2:** Sek 1:8; 6:1-6.

v<sup>l</sup>-inuana vahitau yawayawai wayahia movina anononi, ivona, “En<sup>l</sup>-omoi.”

<sup>4</sup> Akaka kadu aitam osiV omo, ka tauna yabebenina ai ananata deina, ka a tau vi-ata bagibagi vaniahei, e tauna ana pata ma<sup>l</sup> gomago-manina tanopia n<sup>l</sup>-epa-yavunei, ka tauna ana pata tomotau veimeyei tau<sup>l</sup> yaiai inau-vi-anigi. Ka tauna inama ananina vaniahei.

<sup>5</sup> Ka Lami-nanaV pai ginuma nunumina a pai bou-pota v<sup>l</sup>-itonuna bwege-yavunei. Ka v<sup>l</sup>-itonuna vahitau yawayawai wayahia movina anononi, ivona, “En<sup>l</sup>-omoi.” Ka adunedune, ka tepaua aitam osiV nigenigena mimini adueyei, ka a tau vi-ata aitam pai ito-pwapwa aniani wayahina nimana poy<sup>l</sup>-avini.

<sup>6</sup> Ka aitam putuna anononi vahitau yawayawai wayahia, a nonona movina deina, ka movi-nana osiV a tau vi-ata vonei, ivona, “Tomotau ai nau-pata yai paisewa auyewa aitamoata wayahina kikituna, vivane witiV a ito-pwapwa<sup>a</sup> aitamoata, o kadi baliV a ito-pwapwa aitonu. Ka eha oliveV wetona evi-goyoi, ka eha wainaV evi-goyoi.”

<sup>7</sup> Ka Lami-nanaV pai ginuma nunumina a pai bou-pota vi-nau-punina bwege-yavunei. Ka vi-nau-punina vahitau yawayawai wayahia movina anononi, ivona, “En<sup>l</sup>-omoi.”

<sup>8</sup> Ka adunedune, ka tepaua aitam osiV mimini adueyei, ka ana dune tau mate wagana deina, ka a tau vi-ata ana wava Aniga, ka kadu tauna

---

<sup>a</sup> **6:6:** Ito-pwapwa taina eha ananina, kadi 1 *lita* ana pata deina. (Edu *lita Vona nihenina*.)

munina nepena HadesiV vi-munie. Ka tau i bagibagi ivaniahei, e tomotau inau-vi-anigi. Aituhu tau ma' tanopi habuhabui katana-vewani gwau ai yau 4 wayahia, akanai Aniga a niam nui ai pata gwau aitamoata wayahia inau-vi-anigi inama wayahina, ka am navovo wayahina, ka muya wayahina, ka kadu vahitau udaudana wayahia.

☆

9 Ka Lami-nanaV pai ginuma nunumina a pai bou-pota vi-5-na bwege-yavunei. Ka vi-nomu a pai vi-ai ipuna adunedune, e tomotau nuai adueyei. Tuta nonova wayahina tanopia Yaubada yana vona ivitumahanei kadu ihaehaeyei toyoina. Wayahina, ai havia inau-vi-anigi.

10 Ka tau i movi anani ivivi-hone, ivonavona kadu ivi-tanatanai, “Kauvea, wamke Tau Bagibagi-vainem! Ka wamke ahihimata ka tunutunuhim. Itoai avaha apotapota a itoava wamke tau ma' tanopi enau-yanahi wayahina, e ai dewa-yaiyai evi-nua-dadani evenei ivaniahei, vivane ai nau-pata ama aniga wayahi. Ka ai vi-am auyewa kadu nau-wawaniai apotapota?”

11 Ka yai vonana iakwa, e aitamoata aitamoata wayahia kwama kavukavuna ka mamana ivaniahei, ka aitam movi vonei, ivona, “Itomi nau-wawanimi yaiami kadu vavaneimi upotapotai. Iuna tuta eha ani-hoina na-iakwa wayahina, e tau ma' tanopi tau i inau-vi-anigi taumi aitamoata deinake. Wayahina, nau-wawanimi upotapota a itoava avaha tau i habuhabui ai yau inau-yehai iakwa

☆ 6:8: Ese 14:21; 5:17; Ier 15:1-3.



wayahina.” ✧

<sup>12</sup> Ka adunedune, e Lami-nanaV pai ginuma nunumina a pai bou-pota vi-6-na bwege-yavunei. Ka yoyoyo ananina si-putu, ka babau vi-nigenige, kwama moimoiana nigenigena gotiV vutuvutuna wayahina inau-vevewanei deina, ✧

<sup>13</sup> ka wadima wahuma ipeu iopu-me tanopia, ai madaiba uana pai nau-yehata memeanina imaumaua tanopia yahina bagibagina hunahuna wayahina deina. ✧

<sup>14</sup> Ka wahuma adueyei nunumi maiova, ana dune pai ginuma nunumina tomotau inunumi deina. Ka tanopia adunedune, ka oya aitamoata aitamoata kadu bonabona aitamoata aitamoata adueyei ai avutu ivenau-tawanei. ✧

<sup>15</sup> Ka kiniV habuhabui tanopia, ka kiniV natunatui, ka tau nau-havia ai tau veimea, ka tau kaikaiwabo, ka tau bagibagi, ka tau paisewa-kavokavovo aitamoata aitamoata, ka tau ai pata ai heta yawai iveimeyei, aitamoata aitamoata wayahia inovu-tawanei ineine guba wayahia, o kadi oya ai hanu anani wayahia ihivahivai. ✧

<sup>16</sup> Ka ivivi-hone oya wayahia, o hanu wayahia, ivonavona, “Oya! Hanu! Upeupeu ka uop-upu-me hetaia! Ka uhivai tauna pai manu-ena ahihi-vaine-nana hetana manuenta tepana wayahina, ka uhivai Lami-nanaV ya nua-goyo wayahina! ✧

---

✧ **6:11:** SiV 7:9, 13; 19:14. ✧ **6:12:** Mat 24:29; Dew 2:20; SiV 8:12; 11:13; 16:18. ✧ **6:13:** Isa 34:4. ✧ **6:14:** SiV 16:20. ✧ **6:15:** Isa 2:10, 19, 21. ✧ **6:16:** Luk 23:30.

17 Iuna tauai ainuai yai nua-goyo an' auyewa avaha omoi, ka eha aitam koiaka ana pata tauai mataia na-mini.” ✧

## 7

### *Anelose Me Israeli Ai Yau 144,000 Vo-pwatei*

1 Dewaia tanoi iakwa, e anelose ai yau na nau-punina adueyei imimini tanopi a papani ai yau na nau-punina wayahia. Ka anelose-naia yahina ai yau na nau-punina ipoy'-avini. Wayahina, eha aitam yahina ana pata na-huna tanopi wayahina, o hawana wayahina, o ai wayahia. ✧

2 Ka kadu aitam anelose adueyei ponimanea vanevane. Ka tauna wayahina vivane Yaubada Yawayawaina ya pai ainana. E tauna movina ananina wayahina vi-hone anelose na nau-punina wayahia, vivane tauai yai bagibagi mamaei, e tanopi ka hawana ivi-goyoi, ka tauna ivona,

3 “Eha tanopi, o hawana, o ai uvi-goyo. Upotapota a itoava pai ainana yaka Yaubada ya tau paisewa tepaia avo-pwatei na-iakwa wayahina.” ✧

4 Ka tomotau-naia pai ainana ivaniahei ai yau anononi, vivane 144,000 me Israeli yai dede habuhabui wayahia deina. ✧

5 Dede Iuda wayahina tomotau 12,000 pai ainana tepaia ivaniahei, ka dede Reubeni

---

✧ 6:17: Ioe 2:11; Mal 3:2. ✧ 7:1: Ier 49:36; Dan 7:2. ✧ 7:3: Ese 9:4, 6; SiV 9:4. ✧ 7:4: SiV 14:1, 3.

wayahina tomotau 12,000, ka dede Gadi wayahina tomotau 12,000,

<sup>6</sup> ka dede Asera wayahina tomotau 12,000, ka dede Napitali wayahina tomotau 12,000, ka dede Manase wayahina tomotau 12,000,

<sup>7</sup> ka dede Simeoni wayahina tomotau 12,000, ka dede Levi wayahina tomotau 12,000, ka dede Isakara wayahina tomotau 12,000,

<sup>8</sup> ka dede Sebuluni wayahina tomotau 12,000, ka dede Iosepa wayahina tomotau 12,000, ka dede Beniamina wayahina tomotau 12,000 pai ainana tepaia ivaniahei.

### *Yoko Ani-vainena*

<sup>9</sup> Ka dewana iakwa, e adunedune ka yoko ani-vainena tepaua adueyei, ka eha aitam koiaka ana pata ai yau na-iavi. Tomotau iomo pai veimea aitamoata aitamoata wayahia, ka dede aitamoata aitamoata wayahia, ka yoko aitamoata aitamoata wayahia, ka kadu movi aitamoata aitamoata wayahia iomomoi. Ka tau i imimini pai manuena ahihi-vaine-nana matana wayahina kadu Lami-nanaV matana. Ka habuhabui ai kwama kavukavuna ka mamanaina, ka nimaia idabewaga ipoy'-avini.

<sup>10</sup> Ka movi ananina ivivi-hone, ivonavona,

“Yama Yaubada pai manuena  
 ahihi-vaine-nana hetana manuena.  
 Ka ama ito-yavuha yama Yaubada  
 wayahina vin'-omo,  
 kadu Lami-nanaV  
 wayahina vin'-omo.” ☆

---

☆ **7:10:** SiV 4:10; 5:6-7.

11 Ka pai manuenta ahihi-vaine-nana awaniaia, ka ononotoi anani awaniaia, ka kadu vahitau yawayawai na nau-punina awaniaia anelose habuhabui imimini-vivinei. Ka tau'i ivi-tupa-gum, ivi-kabubu tepaia tanopia pai manuenta ahihi-vaine-nana matana, ka habuhabui Yaubada wayahina iawa-dava.

12 Ivonavona,

“Ana pata deina, vona-vavaha!  
 Yama Yaubada nau-wawani  
 awa-dava, ka didiga,  
 ka nua-uya, ka nau-kaiwa,  
 ka apa-vidovidoha, ka pai veimea,  
 ka bagibagi vaniahei,  
 kadu tauna nau-wawani  
 dewaia wayahina mamaei,  
 tuta eha a ito-vewana wayahina.  
 Ana pata deina!” ✧

13 Iakwa, e ononotoi anani wayahia aitam vi-tanaieu, ivona, “Tomotau taina ai kwama kavukavuna ka mamananaina avi tomotau? Tau'i aveta baina wayahina ivin'-omo?”

14 Ka yauke avona-nau-pata, avona, “Bada, wamke eanamanei, yauke eha.”

Wayahina tauna voneu, ivona,  
 “Tomotau taina tanopia imamaei nau-dadana ani-vainena ana tuta nihenina, ka inahe ivaniahei, kadu ivane-tawanei. Tau'i ai kwama inosi-neiei Lami-nanaV dayahina nihenina, ka dayahina kwamaia vo-vi-kavukavui. ✧

<sup>15</sup> Wayahina, tau i mamaei Yaubada ya pai manuena ahihi-vaine-nana matana wayahina, ka tauna ya Manua Vito-pota wahuma nihenina aviani ya nuanua, tau idedewei auyewa kadu ioyoma. Ka tauna pai manuena ahihi-vaine-nana wayahina manuena dune-vi-avini, kadu tauna dewa goyona habuhabui wayahia bou-potai eha ivaniahe.

<sup>16</sup> Wayahina, tuta tepakaia wayahina, eha kadu aitam tuta wayahina tau am inavovo, ka eha kadu aitam tuta wayahina magari n'-ayaya. Ka babau weweavina o mani dewa weweavina eha ana pata n'-apu-yayai iviviha. ✧

<sup>17</sup> Iuna Lami-nanaV yai tau dune-vi-avina. Ka tauna pai manuena ahihi-vaine-nana niwanina mamaei, ka tauna ya nuanua na-eta-naoi, e daudau yawayawai ivaniahei inimnim. Ka tuta tepakaia wayahina, Yaubada tau mata-inui habuhabui yai nua-vita wayahina na-nau-wohi-yavunei ina-iakwa.” ✧

## 8

### *Pai Ginuma Nunumina A Pai Bou-pota Vi-7-na*

<sup>1</sup> Ka Lami-nanaV pai ginuma nunumina a pai bou-pota vi-7-na bwege-yavunei. Ka wahuma genugenuanina a itoava tuta kutakutana iakwa wayahina. Tuta-nana a vi-manamana deina, aituhu babau aitamoata katana-vewani ainua, ka aitamoata ana heta kan'-epei.

---

✧ **7:16:** Isa 49:10. ✧ **7:17:** Isa 25:8; Sam 23:2; SiV 21:4.

<sup>2</sup> Ka tuta-nana kutakutana iakwa, e anelose ai yau 7 Yaubada matana imimini adueyei, ka aita-moata aitamoata wayahia yai bwegigi ivaniahei.

<sup>3</sup> Ka kadu aitam anelose adueyei. Ka tauna aitam pai mau a pai vi-ai goulaV nimana, omo, e vi-nomu a pai vi-ai goulaV matana mini. Ka tauna pai mau ani-vainena vaniahei vivane nau-wawani tau ekalesia yai viama nui vi-nomui vi-nomu a pai vi-ai goulaV hetana. Ka vi-nomu a pai vi-ai tanoi pai manuena ahihi-vaine-nana matana mamaei. ✧

<sup>4</sup> Ka vi-nomu a pai mau ana bawa kadu tau ekalesia yai viama, ainua ivanevane Yaubada matana anelose-nana nimana wayahina.

<sup>5</sup> Iakwa, e anelose-nana ya pai vi-ai epei, e ai ananata vi-nomu a pai vi-ai tanoi wayahina vi-nau-vi-anai, ka onei iopu tanopia. Ka anitana, ka dududui, ka vonaina ivi-putu ka kadu yoyoyo si-putu. ✧

### *Ivi-putu Bwegigi Ivaivaini*

<sup>6</sup> Dewana iakwa, e anelose-naia bwegigi ai yau 7 wayahia ivo-vi-aiaia ina-vaini.

<sup>7</sup> Ka anelose naona tauna ya bwegigi vaini, e hanu wei toyoina ka aya-popouna, ka tumi-vainena ivin'-omo ai ananata wayahina kadu dayaha wayahina, ka habuhabui onei iopu atuatuna tanopia. Aituhu tanopi habuhabuna katana-vewani papani aitonu wayahia, akanai papani aitamoata wayahia anai. Papani tanoi nihenina tano habuhabui anai, ka ai habuhabui

---

✧ **8:3:** SiV 5:8; NiT 30:1-3. ✧ **8:5:** Lev 16:12; NiT 19:16-19; SiV 11:19; 16:18.

anai, ka kadu wetau ananawina habuhabui anai iakwa. ☆

<sup>8</sup> Ka anelose v'-inuana tauna ya bwegigi vaini, e aitam amane oya ananina ananata deina onei iopu hawana nihenina. Ka aituhu hawana katana-vewani papani aitonu wayahia, akanai papani aitamoata wayahia vi-dayaha.

<sup>9</sup> Ka papani taina nihenina vahitau habuhabui ianiga, ka amanena kadu wae habuhabui vita-vovoni iakwa.

<sup>10</sup> Ka anelose v'-itonuna tauna ya bwegigi vaini, e wadima ananina ananata, ana dune odama deina, wahuma ipeu iopu tanopi a daudau wayahia. Ka aituhu tanopi a daudau kadu a tovoha habuhabui katana-vewani papani aitonu wayahia, akanai wadima-nana daudau-naia papani aitamoata wayahia vi-goyoi.

<sup>11</sup> Wadima-nana ana wava Honahonana. Ka daudau habuhabui papani-nana nihenina ivi-honahona. Ka tomotau yoko habuhabui daudau honahonai inimnim, e ianianiga. ☆

<sup>12</sup> Ka anelose vi-nau-punina tauna ya bwegigi vaini, e babau igoyo. Aituhu babau katana-vewani papani aitonu wayahia, akanai papani aitamoata wayahia vi-novanovana, ka wahava deina, papani aitamoata papani aitonu wayahia vi-novanovana, ka kadu wadima deina, papani aitamoata papani aitonu wayahia vi-novanovana. Habuhabui yai maheta ihanua. Wayahina, auyewa nihenina, tuta aitamoata tuta aitonu wayahia vivane novanovanina, ka kadu

---

☆ **8:7:** Ese 38:22; Ioe 2:30; NiT 9:23-26. ☆ **8:11:** Ier 9:15.

ioyoma nihenina, akanai tuta aitamoata tuta aitonu wayahia vivane novanovina. ✧

<sup>13</sup> Ka yauke dewaia tanoi wayahia adunedune, ka manubada wahuma adueyei, you niwania yaveyaveha, ka movina ananina wayahina vivi-hone anononi, ivona, “Aioi! Aioi! Aioi, itomi tau ma' tanopi wayahimi. Iuna tuta eha ani-hoina na-iakwa wayahina, e anelose-naia aitonu itupwa yai bwegigi ina-vaini, e vita-vainena in'-omo!” ✧

## 9

### *Bwegigi Pai Nau-yehata Aitonu*

#### *Aioi Naona*

<sup>1</sup> Ka anelose vi-5-na tauna ya bwegigi vaini, e aitam wadima adueyei, ka wadima-nana avaha wahuma ipeu iopu tanopia. Ka wadima-nana Guba ananina a pai yavuha vaniahei. ✧

<sup>2</sup> E tauna Guba-nana waei, e bawa ani-vainena vin'-omo vanevane, ka bawa-nana ana dune kwau ananina deina. Ka babau kadu wahuma vi-novanovana. ✧

<sup>3</sup> Ka bawa-nana wayahina amane habuhabui iopupu-me tanopia. Amane-naia ai dune wakipou tupwana deina, kate tau i yai pohavu ivaniahei weweda deina.

<sup>4</sup> Ka tau i veimea ivaniahei anononi, vivane wetau, ka baguna, ka ai habuhabuna vito-potai wakipou-naia wayahia. Eha ai pata dewaia ivi-goyo. Kate aituhu avi tomotau eha pai ainana

---

✧ **8:12:** Ese 32:7; SiV 6:12-13. ✧ **8:13:** SiV 9:12; 11:14. ✧ **9:1:** SiV 20:1. ✧ **9:2:** Nao 19:28; Ioe 2:2, 10; NiT 10:12-15.



Yaubada wayahina tepaia ta-mamae, akanai wakipou-naia ai pata tomotau ivo-vihavihai. ✧

<sup>5</sup> Eha ai pata inau-vi-anigi, kate ai pata ivo-vihavihai, kadu ai pata viha ani-vainena iveneveni a itoava wahava ai yau 5 ina-iakwa wayahina. Ka viha-nana vivane weweda yai pohavu deina.

<sup>6</sup> Ka wahavaia nihenia tomotau habuhabui yai nuanua in'-aniga. Wayahina, inaunau-nene aniga wayahina, kate inene-wayohe, iuna aniga na-novo-tawanei, eha ai pata in'-aniga. ✧

<sup>7</sup> Ka wakipou-naia ai dune osiV avaha ivo-vi-aiiaia havia wayahina. Ununuia amane kunu-nabanaba goulaV deina iweteweteni. Ka tepai ai dune tomotau tepai ai dune deina. ✧

<sup>8</sup> Ka apanai vaivine apanana mamainaina deina, ka nihoi lioniV nihoi deinake. ✧

<sup>9</sup> Ka manakadai ibou-potepotei pai bou-pota wayahia, ka pai bou-pota-naia ai nau-vevewana ai dune kainumu deina. Ka papei putuna ani-vainena, a nonona anitana deina, o kadi a nonona osiV habuhabui inau-bwanunua havia wayahina deina, o kadi a nonona pai nau-havia a pai vi-ata osiV itaitaini habuhabui ivenavenau deina. ✧

<sup>10</sup> Ka kadu hiui nihenina tonana mamaei, weweda hiui deina. Ka hiui wayahia ai pata tomotau itonatonai, ka wahavaia ai yau 5 nihenia iviviha ani-vainena.

<sup>11</sup> Ka kadu ai tau veimea aitam anelose. Tauna vivane Guba-nana a tau dune-vi-avina, ka tauna ana wava me Ebereu movia ivona “Abadoni”,

---

✧ 9:4: SiV 7:3. ✧ 9:6: Iob 3:21; Ier 8:3. ✧ 9:7: Ioe 2:4. ✧ 9:8: Ioe 1:6. ✧ 9:9: Ioe 2:5.

ka me Girisi movia ivona “Apolioni”. Ainua a vo-vina vivane “Tau Vita-vovona”.

<sup>12</sup> Ka aioi naona iakwa, ka aioi ainua iomomo.

### *Aioi V'-inuana*

<sup>13</sup> Ka anelose vi-6-na tauna ya bwegigi vaini, e aitam movi anononi omomo pai vi-nomu goulaV tonana wayahina. Pai vi-nomu tanoi Yaubada matana mimini.

<sup>14</sup> Ka movi-nana anelose vi-6-na na bwegigina wayahina ivona, “Anelose-naia ai yau na nau-punina daudau ananina, ana wava Daudau Eupiratesi, nihenina yohoyohoni imamaei eyavuhi.”

<sup>15</sup> E tauna omo yavuhi. Nonova Yaubada anelose-naia vo-vi-aiaia, ka hivei vivane babau-nana wayahina, ka auyewana wayahina, ka wahava-nana wayahina, ka kadu ponimanana wayahina ivin'-omo. Ka yai paisewa taina. Tau ma' tanopi habuhabui wayahia, aituhu katana-vewani gwau aitonu wayahia, gwau aitamoata ina-nau-vi-anigi. ☆

<sup>16</sup> Ka anelose-naia ai tau nau-havia osiVivi-ata ai yau anononi vivane 200,000,000.

<sup>17</sup> Ka yau dune nihenina osi-naiaV ka ai tau vi-ata-naia ai dune adueyei taina deina. Taiu manakadai ibou-potei pai bou-pota wayahia. Ka pai bou-pota-naia tupwai yabebenina, ai ananata ana dune deinake. Ka tupwai nigenigena, hawana ito-niuna ana dune deina. Ka tupwai kovukovuna, sulipuraV deina. Ka osi-naiaV ununui ai dune lioniV ununui deina, ka awawai

---

☆ 9:15: SiV 8:7-12.

wayahia ai ananata, ka bawa, ka kadu sulipuraV  
ivin'-omo-nananena.

18 Ka dewaia aitonu awawai wayahia  
ivin'-omo-nananena, vivane ai ananata, ka  
bawa, ka kadu sulipuraV, tau ma' tanopi  
habuhabui wayahia, aituhu katana-vewani  
gwau aitonu wayahia, gwau aitamoata  
ina-nau-vi-anigi deina.

19 Iuna osi-naiaV yai bagibagi awaia kadu hiuia  
imamaei. Ka hiui mwata deina, iuna hiuia un-  
unui imamaei, ka ununuia wayahina osi-naiaV  
tomotau ai gonia iveneveni.

20 Ka dewaia eha tau ma' tanopi habuhabui  
ita-nau-vi-anigi. Tupwai imamaei, kate tau  
ununui toyoina. Wayahina, tau yai dewa goyona  
wayahia eha ita-nua-vinana. Yai dewaia vivane  
nua gawagawamina wayahia iaiwaodu, ka itup-  
wana tunina tunina nimaia inau-vevewane-neiei  
wayahia iaiwaodu, tupwai goulav wayahina, ka  
tupwai silivaV wayahina, ka tupwai bironeseV  
wayahina, ka tupwai hanu wayahina, ka tupwai  
iai-tai ai wayahina. Dewaia habuhabui dewa  
vitupu. Iuna itupwana eha ai pata idunedune,  
ka eha ai pata ivanevaneneha, ka eha ai pata  
ini-awana. ✧

21 Ka kadu tomotau eha ita-nua-vinana yai  
nau-vi-aniga wayahia, o kadi yai banauma  
wayahia, o kadi yai kenene o yai gema wayahia,  
o kadi yai vainau wayahia. Tepai toyoina.

## 10

---

✧ 9:20: SiV 16:9, 11; Sam 115:4-7; 135:15-18; Dan 5:23.

*Anelose Aitam Pai Ginuma Nunumina Wayahina*

<sup>1</sup> Ka kadu aitam anelose bagibagina wahuma opupuei adueyei, ka tauna ana kwama vivane you, ka wei ana boa tepana hetana vane-vivinei. Ka tepana ana dune babau deina, ka kadu aena ivo-vi-namanamani ai yabeyabena deina.

<sup>2</sup> Ka anelose-nana pai ginuma nunumina kikituna poy'-avini nimana, ka avaha yaveni. Ka aena ateina hawana boui, ka aena akenina tanopia boui,

<sup>3</sup> ka movina ananina wayahina konua, a nonona lioniV ibanihaha deina. Ka avaha konua iakwa, e anitana ai yau 7 ipuipupu.

<sup>4</sup> Ka avaha anitana movi anononi, e avo-vi-aiiai vonaia aginumi, kate aitam movi wahuma wayahina omo, e voneu, ivona, "Aviani anitana ai yau 7 ivonei, ehivei akanai. Eha eginumi." ✧

<sup>5</sup> Iakwa, e anelose-nana avaha adueyei hawana ka tanopia mimini, tauna nimana ateina si-nai wahuma, ✧

<sup>6</sup> e vona-dabadaba Yaubada a wavea. Yaubada vivane Tau Ma'-vavaha, ka tauna wahuma ka dewa habuhabui wahuma nihenina vevewanei, ka kadu tanopi ka dewa habuhabui tanopi nihenina vevewanei, ka kadu hawana ka dewa habuhabui hawana nihenina vevewane-neiei. Ka anelose-nana ivona, "Vi-kiwada ana tuta avaha iakwa!

<sup>7</sup> Iuna avi tuta anelose vi-7-na ya bwegigi na-vaini, auyewana wayahina Yaubada ya nu-anua hivahivai habuhabui na-nau-yehai. Tauna

---

✧ 10:4: Dan 12:4, 9. ✧ 10:5: VV 32:40; Dan 12:7.

avaha ya tau paisewa, vivane tau apa-taputapu, haehaeyei, ka tuta nonova wayahina a itoava tuta ataina wayahina dewaia iapa-taputapuei deina.”  
 ☆

<sup>8</sup> Ka movi-nana wahuma avaha anononi kadu aitam tuta wayahina voneu, ivona, “Ena-nei anelose-nana hawana ka tanopia mimini wayahina, e pai ginuma-nana nunumina yaveyavenina nimana en'-epei.”

<sup>9</sup> Wayahina, aomo anelose-nana wayahina, e pai ginuma-nana nunumina kikituna aviamei. Akaka tauna voneu, ivona, “Ahihina, en'-epei, en'-ania. Ka awama dibidibina, mamau a daudau deinake. Kate avaha etononi, akanai amo-poam vi-honahona.” ☆

<sup>10</sup> E pai ginuma-nana nunumina kikituna aepei anelose-nana nimana wayahina, e ania. Ka awaua dibidibina, a uta-dadana mamau a daudau deina, kate avaha atononi amo-poau vi-honahona.

<sup>11</sup> Iakwa, e aitam movi anononi voneu, ivona, “Wamke nau-wawanim eapa-taputapu-havine yoko habuhabui wayahi, ka papani habuhabui wayahi, ka movi habuhabui wayahi, ka kadu kiniV habuhabui wayahi.”

## 11

### *Yaubada A Tau Hae Ainua*

<sup>1</sup> Munia vekuvekuna mamananaina ivoneu, ka vekuvekuna vivane pai bou-viwava aitam, ka aitam movi voneu, ivona,

---

☆ **10:7:** Amo 3:7. ☆ **10:9:** Ese 2:8-3:3.

“Emini, e Yaubada ya Manua Vito-pota ka a pai vi-nomu wayahina ena-ito-viwavei, e kadu tau iwaodu nihenina ai yau ena-iavi. ✧

<sup>2</sup> Kate pai ni-awana papani upuna eha eito-viwave, iuna pai ni-awana papani tanoi avaha awaehei tau i eha me Iudea wayahi. Ka tuta tepakaia wayahina meagai ahihinata ivo-vi-gawagawami, iva-taunei wahava ai yau 42 nihenia. ✧

<sup>3</sup> Ka yauke au tau hae ainua yai bagibagi awaehei, e avi-tunei iapa-taputapu. Ka tau i ai kwama moimoiana ka badobadona, ka in'-apa-taputapu a itoava auyewa ai yau 1,260<sup>a</sup> ina-iakwa wayahina.”

<sup>4</sup> Tau hae-naia ainuai vivane ai olive<sup>V</sup> ainua kadu lampa<sup>V</sup> a pai vi-ai ainua, ka tanopi habuhabuna a Kauvea matana imimini. ✧

<sup>5</sup> Wayahina, aituhu aviyaivia idewa-dadani tau hae-naia inau-haviai, akanai tau hae-naia awaia ai yabeyabena vin'-omo, e ai havia na-vita-vovoni deina. Ka aituhu aviyaivia yai nuanua tau hae-naia ivi-goyoi, akanai tomotau nau-wawani in'-aniga aitamoata deina. ✧

<sup>6</sup> Ainuaia yai bagibagi wayahia. Wayahina, yai apa-taputapu ana tuta nihenina, avi tuta yai nuanua, akanai tau i ai pata wei ibou-potei wahuma, eha ana pata n'-atuatuna tanopia. Ka kadu yai bagibagi wayahina ai pata daudau kadu tovoha ivo-vi-dayaha, ka kadu avi tuta yai nuanua ai

---

✧ **11:1:** Ese 40:3; Sek 2:1-2. ✧ **11:2:** Luk 21:24; SiV 13:5.

**a 11:3:** Auyewa ai yau 1,260 ka wahava ai yau 42 ainua tuta a vi-manamana aitamoata. ✧ **11:4:** Sek 4:11-14. ✧ **11:5:** 2Sa 22:9; Sam 97:3.

pata muya tunina tunina iva-tawanei in'-omo tanopia. ✧

7 Ka munia, avaha tau hae-naia yai hae inau-yehai, aitam vahitau na-vane Guba-nana wayahina, na-ni-ubau, ka tauna nau-haviei, na-vane-tawanei, e nau-vi-anigi. ✧

8 Na-iakwa, e tau vi-meagai-naia tau matei ainuai meagai ananina etawana nihenina ibouni, idauva-kavokavovo. Ka meagai-nana ana wava vona baimina ainua. Ivi-wahani Sodom, kadu ivi-wahani Egipita. Ka nonova meagai-nana nihenina tau hae-naia yai Kauvea ai nahenahea itutu-pwatei. ✧

9 Ka tau vi-meagai-naia nui tomotau habuhabui ivin'-omo yoko aitamoata aitamoata wayahia, ka dede aitamoata aitamoata wayahia, ka movi aitamoata aitamoata wayahia, ka kadu papani aitamoata aitamoata wayahia, ka auyewa aitonu kadu tupwana nihenia tau matei wayahia idunedune, kadu ai itavuna ivihahaiei, iuna yai aniga wayahina idewa-haiawa.

10 Ka tau ma' tanopi inua-vane kadu idewa-haiawa. Ka yai dewa-haiawa wayahina, am-venena-kavovo ivi-maiei, e yaiai wayahia iva-tawanei. Iuna tutana tau hae-naia iapa-taputapu, ainuai tau ma' tanopi ivitavita.

11 Ka auyewa aitonu kadu tupwana iakwa, e Yaubada tauna yawaina va-tawanei iopu inu tau hae-naia nihenia, e ainuai aeia imini! Wayahina, matauta ani-vainena tau dunedune-naia epai. ✧

---

✧ **11:6:** 1Ki 17:1; NiT 7:17-20; 1Sa 4:8. ✧ **11:7:** Dan 7:21; SiV 12:17; 13:7; 17:8. ✧ **11:8:** Luk 13:34. ✧ **11:11:** Ese 37:5, 10.

<sup>12</sup> Ka movi ananina wahuma vin'-omo iopu tau hae-naia wayahia, ivona, “Uvane-mei baina.” Ka you nihenina ainuai ivane wahuma, ka ai havia idune-yavava. ✧

### *Yoyoyo Ananina*

<sup>13</sup> Ka babau-nana wayahina yoyoyo ananina si-putu, e aitam papani meagai-nana nihenina a papani ai yau 10 wayahia am-bwegei iopu tanopia. Ka yoyoyo-nana wayahina tomo-tau ai yau 7,000 ianiga. Ka aituhu aviyaivia yoyoyo-nana wayahina itupwa, akanai imata-matauta ananina, ka ivonavona, “Wahuma a Yaubada ana heta ana pata dewa-bagibagi-nana dewei.” ✧

<sup>14</sup> Aioi v'-inuana iakwa, ka aioi v'-itonuna tuta eha ani-hoina na-iakwa wayahina vi-putu. ✧

### *Aioi V'-itonuna*

<sup>15</sup> Ka anelose vi-7-na tauna ya bwegigi vaini, e wahuma movi anani anononi, ivonavona,

“Tanopi taina avaha vi-pai veimea  
yaka Kauvea wayahina  
kadu tauna Natu-hoina wayahina,  
vivane yaka Tau Ito-yavuha wayahina.  
Ka Kauvea ya veimea na-ma'-vavaha  
akanai.” ✧

<sup>16</sup> Ka ononotoi anani ai yau 24 tau avaha yai pai manuenta ahiahina Yaubada matana

✧ **11:12:** 2Ki 2:11. ✧ **11:13:** SiV 6:12; 16:18. ✧ **11:14:** SiV 9:12.

✧ **11:15:** NiT 15:18; Sam 10:16; Dan 2:44; 7:14.



imanuena, ka tepaia ivi-tupa-gum, ka Yaubada wayahina iaiwaodu,

<sup>17</sup> ivonavona,

“Yama Kauvea Yaubada Tau Bagibagi-vainem,  
ataina emamaei, ka nonova emamaei.

Wamke avaha yam pai veimea bagibagina  
esi-vin'-omanei kadueyei,

ka avaha evi-putu eveimeyei.

Wayahina anau-kaiwa wayahima.

<sup>18</sup> Tau ma' papani, papani habuhabui nihenia,  
inua-goyo ka imaga-bawe

yam dewaia wayahi,

ka yam nua-goyo wayahina

ai dewa-yaiyai vin'-omo.

Ika. Ataina tuta wayahina vitana matana an'  
auyewa

avaha vin'-omo tau aninigai wayahi.

Ka kadu nau-pata ahiahina an' auyewa

avaha vin'-omo yam tomotau wayahi,

vivane yam tau paisewa wayahim

iapa-taputapu wayahi,

ka yam tau ekalesia wayahi,

ka kadu aituhu aviyaivia am wava

iapa-vidovidohei wayahi,

taui ai wava kikitui wayahi

kadu taui ai wava anani wayahi.

Ka kadu vita-vovona an' auyewa

avaha vin'-omo taui tau ma' tanopi

ivita-vovoni wayahi.” ☆

---

☆ **11:18:** Sam 110:5; Rom 2:5; SiV 20:11-13; Sam 115:13.

19 Iakwa, e Yaubada ya Manua Vito-pota wahuma nihenina an' awa-pota am-waei, ka nihenina ana pata tauna yan' awaeha a pai vi-ai adueyei. Ka vonaina, ka dududui, ka anitana vin'-omo-nananena, ka kadu aitam yoyoyo si-putuputu, ka kadu aitam dewa vin'-omo wedinia deina, vivane hanu wei toyoina ka aya-popouna, ka tutumi-vainena atuatuna tanopia. ✧

## 12

### *Vavine Ka Vahitau Unununa Ai Yau 7*

<sup>1</sup> Ka wahuma aitam iaiaya vin'-omo, ka iaiayana dewa ananina. Aitam vavine adueyei, ka ana kwama vivane babau, ka wahava aena ipuna mamaei, ka unununa wayahina a kunu-nabanaba weteweteni, vivane wadima ai yau 12.

<sup>2</sup> Ka vavinena amwanainahei, ka konukonua, iuna tuta eha ani-hoina na-iakwa wayahina, vi-natuna. ✧

<sup>3</sup> Ka kadu aitam iaiaya vin'-omo wahuma, ka iaiayana vahitau amane ani-vainena ka yabebenina, mwata deina. Ka mwata-nana unununa ai yau 7, ka tonana ai yau 10, ka kunu-nabanaba ai yau 7 unununa hetaia imamaei. ✧

<sup>4</sup> Ka aituhu wahuma katana-vewani papani aitonu wayahia, mwata-nana hiuna wayahina wadima habuhabui papani aitamoata nihenina onei iopu tanopia. Ka mwata-nana omo vavine-nana amwanainahei wayahina, ka tauna

---

✧ 11:19: Ebe 9:4; SiV 8:5; 15:5; 16:21. ✧ 12:2: Mik 4:10. ✧ 12:3: Dan 7:7.

vavine-nana matana mini-potapota, e avi babau vi-natuna, akanai tauna ana pata natuna n'-ania.  
 ☆

<sup>5</sup> Ka vavine-nana vi-natuna, e tevana onotona. Ka munia, tauna papani habuhabui ai tau veimea bagibagina, ka ya veimea toyoina, kainumu deina. Ka Yaubada vo-kwayavonina, tevanana si-nemei ivane wahuma tauna ya pai manuena ahihi-vaine-nana wayahina. ☆

<sup>6</sup> Ka vavine-nana inovotawanei papani anata wayahina. Ka tanoi wayahina Yaubada avaha aitam pai ma' vo-vi-aiia vavine-nana wayahi, e tanoi tauna dune-vi-avini a itoava auyewa ai yau 1,260 ina-iakwa wayahina.

<sup>7</sup> Ka havia vi-putu wahuma nihenina. Ka anelose ana wava Mikaeli tauna yan' anelose nui mwata-nana inau-haviei, ka mwata-nana tauna yan' anelose nui Yaubada yan' anelose inau-haviei. ☆

<sup>8</sup> Kate mwata-nana ya bagibagi eha ana pata, e Yaubada yan' anelose mwata-nana ivi-peui. Wayahina, mwata-nana tauna yan' anelose nui habuhabui yai pai ma' wahuma ivo-haini.

<sup>9</sup> E Yaubada yan' anelose mwata ani-vaine-nana wahuma wayahina ihaponei iopu. Ka mwata-nana ana wava Satana, ka tuta nonova wayahina tauna vivane nua goyogoyonata, ka ya nuanua tau ma' tanopi habuhabui na-nonoi, na-eta-naonaoni-panipani, e dewa goyogoyoi idedewei. Ka

---

☆ 12:4: Dan 8:10. ☆ 12:5: Sam 2:9; SiV 19:15. ☆ 12:7: Iud 9.

Yaubada yan' anelose mwata-nana tauna yan'  
anelose nui ihaponei iopu tanopia. ☆

10 Ka dewaia iakwa, e wahuma movi ananina  
anononi, ivona,

“Tuta ataina wayahina  
dewa ahiahina avaha ivi-putu,  
vivane yaka Yaubada ya ito-yavuha,  
ka tauna ya bagibagi,  
ka tauna ya pai veimea.

Ka kadu Tau Ito-yavuha  
ya pai veimea avaha vi-putu.

Iuna Yaubada yan' anelose  
avaha vavaneika  
yai tau apa-goyogoyo  
ihaponei iopu akanai.

Nonova tauna yaka Yaubada  
matana mimini,  
ka auyewa ka ioyoma  
vavaneika apa-goyogoyoei. ☆

11 Ka vavaneika tauna ya dewa goyona  
ivane-tawanei Lami-nanaV  
dayahina wayahina,  
kadu ivane-tawanei tau i yai hae  
tunutunuhina wayahina.

Tau i eha yawai ita-nua-tania  
ka eha ita-matamatauta  
aniga wayahina.

Kate tau i yawai iawaehei ianiga  
yai vitumahana wayahina.

12 Wayahina, itomi tau ma' wahuma  
habuhabumi

☆ 12:9: Nao 3:1, 14; Luk 10:18; 22:31; SiV 20:2.  
1:9-11; Sek 3:1.

☆ 12:10: Iob

kadu dewaia habuhabumi wahuma uma-  
 maei  
 nau-wawanimi udewa-haiawa ananina!  
 Kate aioi tanopi ka hawana wayahimi.  
 Iuna Satana avaha iopu wayahimia!  
 Ika, ka tauna nua-goyo ananina,  
 iuna tauna avaha anamanei  
 tuta kutakutana na-iakwa wayahina,  
 e yana tuta ya paisewa wayahina  
 na-iakwa.” ✧

<sup>13</sup> Ka tutana mwata-nana nua-hau i vivane  
 Yaubada yan' anelose wahuma ihaponei iopu,  
 e tauna tanopia mamaei, akanai mwata-nana  
 vi-putu vavine-nana naunau-nene wayahia  
 na-kamoi. Nonova vavine-nana tevana onotona  
 ivi-natunei.

<sup>14</sup> Kate vavine-nana manubada ananina  
 papena ainua vaniahei. E papena wayahina  
 iyaveha iomo yai pai ma' anata nihenina  
 wayahina. Pai ma' tanoi nihenina mwata-nana  
 eha ana pata na-vaniahe, ka tenoke anata  
 nihenina vavine-nana ai ma' kadu ivaita  
 ivaniahei tuta aitamoata kadu tuta ainua kadu  
 tuta tupwana wayahia. ✧

<sup>15</sup> Akaka, mwata-nana awana wayahina  
 daudau ananina nau-vunevunei, aitam  
 daudau taitaina deina. Iuna tauna ya nuanua  
 daudau-nana ananina wayahina vavine-nana  
 na-vo-vi-anue.

<sup>16</sup> Kate tanopi vavine-nana ivaitei, e tanopi  
 awana waei, e daudau-nana habuhabuna tononi.

---

✧ **12:12:** Isa 44:23; 49:13. ✧ **12:14:** Dan 7:25; 12:7.

17 Wayahina, mwata-nana maga-bawe ani-vainena vavine-nana wayahia. Ka tauna ine, e vavine-nana natunatui itupwa nau-haviei. Natunatui tanoi tomotau Yaubada ya veimea ivi-ateteyei, kadu Iesu yana hae ivitumahanei toyoina. ✧

18 Ka mwata-nana omo tania, e tenoke mimini.

## 13

### *Vahitau Amane Ainua*

#### *Vahitau Amane Naona*

1 Ka adunedune, ka kadu aitam vahitau amane hawana vane-me adueyei. Vahitau amanena tonana ai yau 10, ka unununa ai yau 7, ka kunu-nabanaba ai yau 10 tonana hetaia imamaei, ka unununa aitamoata aita-moata wayahina wava mamaei, ka wava-naia habuhabui Yaubada iapa-goyogoyoei. ✧

2 Ka vahitau amane-nana adueyei ana dune simai ananina, ka ito-ponaponamina deina, kate aena ai dune vahitau beariV aena deina, ka kadu awana vivane lioniv awana deina. Ka mwata-nana tauna yana dewa awaehei simai-nana wayahina, vivane simai-nana yana dewa. Ka dewaia vivane mwata-nana ya pai veimea, ka ya pai manuena ahiahina, ka kadu ya bagibagi ani-vainena. ✧

3 Ka simai-nana unununa habuhabui wayahia aitam ana dune nonova, kaiwadi, aniga ana bwaka vaniahei, kate bwaka-nana avaha vidoha.

---

✧ 12:17: SiV 11:7. ✧ 13:1: SiV 12:3; 17:3, 7-12. ✧ 13:2: Dan 7:4-6.

Ka tau ma' tanopi habuhabui nuai vi-tupatupa, ka simai-nana nuai epei ivi-munie. ✧

<sup>4</sup> Ka kadu tomotau mwata-nana wayahina iaiwaodu, iuna tauna ya pai veimea awaehei simai-nana wayahina, ka kadu tau simai-nana wayahina iaiwaodu. Ka matataui ivi-tanatanai, ivonavona, “Koiaka simai-nana deina? Koiaka ana pata nau-haviei, vi-peui? Eha aitam.”

<sup>5</sup> Ka simai-nana meana bagibagina vaniahei, e tauna vona-vanevane, kadu tauna Yaubada apa-goyogoyoei. Ka tauna ana pata tomotau veimeyei, a itoava wahava ai yau 42 ina-iakwa wayahina. ✧

<sup>6</sup> Ka tauna awana waei, e Yaubada apa-goyogoyoei, ka tauna Yaubada ana wava, kadu ya pai ma' wahuma, kadu tau wahuma imamaei bou-opuopuei.

<sup>7</sup> Ka tauna ya pai veimea nihenina ana pata Yaubada ya tau ekalesia nau-haviei kadu vi-peui. Ka tauna tomotau habuhabui veimeyei, vivane dede aitamoata aitamoata wayahia, ka yoko aitamoata aitamoata wayahia, ka movi aitamoata aitamoata wayahia. ✧

<sup>8</sup> Ka tau ma' tanopi habuhabui simai-nana wayahina iaiwaodu. Tau habuhabui ai wava eha ita-mae Lami-nanaV yana buki nihenina, vivane yawai-vavaha ana buki nihenina. Tuta a pai vi-putu wayahina, Yaubada vi-nua-hauhau tomotau Lami-nanaV itutu-pwatei. Ka munia,

---

✧ 13:3: SiV 17:8. ✧ 13:5: Dan 7:8, 25; 11:36; SiV 11:2. ✧ 13:7: SiV 11:7.

Yaubada tauna ya vevewana habuhabuna veve-wanei, vivane wahuma kadu tanopi. ✧

<sup>9</sup> Wayahina, aituhu aviyaivia yai nuanua vonana inononi, akanai yau nuanua ina-nua-hau.

<sup>10</sup> Aituhu aviyaivia tau ekalesia wayahia nau-wawani yohoyohoni ivi-tau paisewa-kavokavovo, akanai, dewana na-omo wayahia ivaniahei deina. O aituhu aviyaivia tau ekalesia wayahia nau-wawani tomotau inama wayahina inau-vi-anigi, akanai dewana na-omo wayahia ivaniahei deina. Vona ahiahina, tau ekalesia habuhabui nau-wawani dewaia tanoi wayahi itoha-vi-anai, kadu nau-wawani yai vitumahana inua-vi-avini. ✧

### *Vahitau Amane V'-inuana*

<sup>11</sup> Ka kadu aitam vahitau amane tanopia vane-me adueyei. Ka vahitau amanena tonana ainua ai dune lamiV tonana kutakutana deina, kate tauna movina mwata-nana movina aita-moata deina.

<sup>12</sup> Ka tauna simai-nana ya pai veimea vaniahei, ka pai veimea-naia veimeyei simai-nana wayahina. Tauna simai-nana ya tau nau-seana, iuna simai-nana awaehei dedewei deina. Ka tauna tau ma' tanopi habuhabui ai veimea venei vivane tau simai-nana wayahina ina-iwaodu. Simai-nana ana bwaka vivane aniga ana bwaka, kate a bwaka-nana avaha vidoha.

<sup>13</sup> Ka vahitau amane-nana tonana ana dune lamiV tonana deina iaiaya ani-vainei dedewei, vivane dewa-bagibagi-vainei. Vona ahiahina,

---

✧ **13:8:** Sam 69:28; SiV 17:8; 20:12, 15; 21:27. ✧ **13:10:** Ier 15:2; 43:11; SiV 14:12.



tauna ana pata ai ananata wahuma vi-honei na-opu tanopia tomotau mataia. ✧

14 Ka tauna tau ma' tanopi nonoi, iuna ya bagibagi mamaei, e iaiaya dedewei simai-nana matana. Ka tauna simai-nana an' anamana vo-vi-natei tomotau mataia. Wayahina, tauna tau ma' tanopi ana-dibidibiei, e tau simai-nana ya itupwana inau-vevewanei, e itupwana tanoi wayahina simai-nana didigana ivo-vi-natei deina. Iuna simai-nana unununa ana bwaka vaniahei inama wayahina, kate yawayawaina.

15 Ka vahitau amane-nana, tauna tonana ana dune lamiV tonana deina, tauna an' awaeha kadu ya bagibagi vaniahei, e tauna ana pata simai-nana ya itupwana tanoi yawai na-veni, vivane itupwana ana pata na-ipupu. Ka itupwana tau ma' tanopi veimeyei ana heta wayahina ina-iwaodu. Ka aituhu aviyaivia veimeana iviha-haiei, akanai itupwanana tomotau habuhabui ai nau-vi-aniga veimeyei.

16 Ka kadu vahitau amane-nana tau ma' tanopi habuhabui nau-vi-nehanehai pai ainana iginumina ivaniahei nimai ateia, o kadi tepaia. Tauna tomotau habuhabui veimeyei idewei deina, tau ai wava kikitui, kadu tau ai wava anani, tau kaikaiwabo, kadu tau payapayaya, tau ai heta yawai iveimeyei, kadu tau tau paisewa-kavokavovo. Habuhabui pai ainana iginumina ivaniahei aitamoata. ✧

17 Ka aituhu aviyaivia pai ainana iginumina ivihahaiei, akanai tau eha ai pata gugua, o aniani ivi-maie, ka eha ai pata ina-imwaneye. Ka pai

---

✧ **13:13:** Mat 24:24; 1Ki 18:24-39; SiV 19:20. ✧ **13:16:** SiV 14:9-11; 16:2; 20:4.

ainana iginumina vivane vahitau simai-nana ana wava, o kadi ana wava a pai iaiava.

<sup>18</sup> Tauna ana wava aitam pai nua-tupatupa. Ka aituhu aviyaivia nua-uya wayahia, akanai tau ai pata ana wava a pai iaiava ivaniahei, iuna pai iaiava-nana onoto a pai iaiava aitamoata deina. Ka tauna a pai iaiava-nana vivane 666.

## 14

### *Tau Ito-yavuha Ya Tomotau Yai Ahe*

<sup>1</sup> Ka adunedune, e Lami-nanaV mataua adueyei. Tauna Oya Sioni hetana mimini, ka tomotau-naia ai yau 144,000 tauna nui imamaei. Tomotau avaha tauna ana wava kadu tauna Amanana ana wava ivaniahei tepaia.

<sup>2</sup> Ka wahuma aitam putuna ananina anononi, a nonona daudau anani itaitaina deina, kadu anitana ananina deina. Ka putu-nana a nonona kadu tomotau yai pai viam-toutou inavinavia, vivane a nonona ahiahina. ✧

<sup>3</sup> Ka tomotau Yaubada ya pai manuena ahihi-vaine-nana matana imimini, ka vahitau yawayawai na nau-punina mataia imimini, ka kadu onotoi anani mataia imimini ahe vovouna iaheahei. Ka eha kadu aitam koiaka ana pata ahena vovouna tanoi na-iavi, akanai tomotau-naia ai yau 144,000 ai heta ai pata iaheahei. Tau Ito-yavuha tau vi-maie-havinei tanopi wayahina. ✧

<sup>4</sup> Ka tomotau-naia eha ita-vi-gawagawami vaivine wayahia, iuna tau ahihinata imamaei. Ka aveta baina Lami-nanaV neine, akanai tau

---

✧ 14:2: SiV 1:15; 19:6. ✧ 14:3: Isa 42:10; SiV 5:9; 7:4.

ivi-muni-waiwaiei. Tauna tau ma' tanopi wayahia vi-maiei, ka taui vivane vi-nomu naona Yaubada wayahina kadu Lami-nanaV wayahina.

<sup>5</sup> Ka eha aitam tuta ivitupu. Akanai taui tau tunutunuhi ana noe.

*Anelose Aitonu Yai Vona*

<sup>6</sup> Ka aitam anelose adueyei hetana yaveyaveha, ka tauna ya paisewa Vaneana Ahiahina ma'-vavaha haehaeyei tau ma' tanopi habuhabui wayahia, papani aitamoata aitamoata wayahia, ka dede aitamoata aitamoata wayahia, ka movi aitamoata aitamoata wayahia, ka yoko aitamoata aitamoata wayahia.

<sup>7</sup> Ka tauna movina ananina wayahina ivona, “Nau-wawanimi Yaubada umatamatautei kadu tauna didigana uvo-vi-natei. Iuna nau-yanahi a babau avaha vin'-omo. Tauna wahuma, ka tanopi, ka hawana, ka tovoha vevewanei. Wayahina, nau-wawanimi tauna wayahina una-iwaodu.”

<sup>8</sup> Iakwa, ka anelose v'-inuana omo, e tauna ivona,

“Avaha ipeu iopu! Ika! Babiloni Ani-vainena avaha ipeu iopu-vavaha. Nonova meagai Babiloni papani habuhabui veimeyei, ka kadu taui Babiloni yai kenene a wainaV inimnim ivi-kwavakwava.” ✧

<sup>9</sup> Iakwa, ka anelose v'-itonuna vi-munie, omo, e tauna movina ananina wayahina ivona,

“Aituhu aviyaivia vahitau simai-nana wayahina ina-iwaodu, o aituhu tauna ya itupwana wayahina ina-iwaodu, o aituhu

---

✧ 14:8: Isa 21:9; Ier 51:7-8; SiV 17:2; 18:2-3.

tauna ana wava a pai ainana iginumina nimaia o kadi tepaia ivaniahei, ☆

<sup>10</sup> akanai, tau kadu Yaubada ya nua-goyo ananina a wainaV inimmim. Ika, wainaV bagibagina tanoi avaha tauna ya nua-goyo ananina ana vei nihenina ito-iwahi, potapotai. Ka tau kadu inahē ani-vainena sulipuraV ananata nihenina ivaniahei anelose ahihinata mataia kadu Lami-nanaV matana. ☆

<sup>11</sup> Ka sulipuraV ananata tanoi ana bawa vanevane-vavaha, tomotau-naia ai viha aitamoata deina. Ka aituhu aviyaivia vahitau simai-nana wayahina ina-iwaodu, o aituhu tauna ya itupwana wayahina ina-iwaodu, o aituhu tauna ana wava a pai ainana iginumina ivaniahei, akanai tau eha ai pata ivi-yawai auyewa wayahina o kadi ioyoma wayahina.” ☆

<sup>12</sup> Vona ahiahina, Yaubada ya tau ekalesia nau-wawani itoha-vi-anai, e dewaia tanoi ivane-tawanei. Ika, tau ekalesia-naia Yaubada ya veimea ivi-ateteyei, kadu tau yai vitumahana Iesu wayahina toyoina. ☆

<sup>13</sup> Ka wahuma movi anononi, ivona,

“Vona taina eginumi. Tuta ataina wayahina a itoava auyewa pai nau-yehata wayahina, aituhu aviyaivia Kauvea ivitumahanei, kadu aituhu tauna nihenina in'-aniga, akanai tomtai avaha nau-iajava ivaniahei deina.”

Ka Nuana Ahihinata awaehei, ka ivona,

“Ika, vona ahiahina. Iuna tau yai paisewa tanopia wayahia ivi-yawai, ka avi paisewa

---

☆ **14:9:** SiV 13:12-17. ☆ **14:10:** Isa 51:17, 22; Ier 25:15-16; Sam 75:8; Ese 38:22; Nao 19:24; SiV 16:19; 20:10; 21:8. ☆ **14:11:** Isa 34:10. ☆ **14:12:** SiV 13:10.

avaha ipaisewei, akanai dewaia ivi-munie  
wahuma.”

*Aihana Ana Tuta Tanopia*

<sup>14</sup> Ka adunedune, ka you kavukavuna adueyei, ka you-nana hetana aitam koiaka manuenta mamaei. Ka tauna ana dune vivane Tauna Vi-tomotau deinake. Ka unununa wayahina kunu-nabanaba goulav weteweteni, ka nimana ya kwasikwasi manimaninina vo-vi-avini. ☆

<sup>15</sup> Ka kadu aitam anelose Manua Vito-pota nihenina wayahina ni-ubau iopu, e tauna vi-hone movina ananina wayahina tauna you-nana manuenta wayahina, ka ivona, “Yam kwasikwasi wayahina en'-aihana. Ika, aihana ana tuta tanopia avaha vin'-omo, iuna ua-nana goyona avaha ihou.”

<sup>16</sup> Wayahina, tauna you hetana manuenta ya kwasikwasi si-wadi-onei, e tanopi an' aihana tane-gwaugwau.

<sup>17</sup> Ka kadu aitam anelose Manua Vito-pota wahuma nihenina wayahina ni-ubau iopu, ka tauna kadu kwasikwasi manimaninina nimana.

<sup>18</sup> Ka kadu aitam anelose pai vi-nomu wayahina omo. Tauna pai vi-nomu an' ai ananata dune-vi-avini, ka a niam na kwasikwasina wayahina vi-hone movina ananina wayahina, ivona, “Yam kwasikwasi wayahina etanei, e dunina wainav uana manawa wayahina tanopia en'-aihana-neiei. Iuna ua-nana goyona avaha ihou.” ☆

---

☆ 14:14: Dan 7:13. ☆ 14:18: Ioe 3:13.

19 Ka anelose-nana ya kwasikwasi si-wadi-onei, ka wainaV uana tanopia aihana-neiei. Ka tauna duninaia habuhabui onei inui Yaubada ya nua-goyo a pai va-buyo ananina nihenina.

20 Ka osiV na tau vi-ataia iomo, e tomotau i va-taunei i va-buyoi pai va-buyo-nana nihenina meagai upuna wayahina. Ka tomotau dayahi taitaina opuopu pai va-buyo wayahina, ka dayaha vanevane a itoava ya vi-bebega osiV unununa vaniahei wayahina deina, ka dayaha taitaina diwaya deina, ka ya vi-manamana vi-vane 300 kilomitaV deina. ✧

## 15

### *Tau Ma' Wahuma Iahehe*

1 Ka wahuma nihenina kadu aitam iaiaya pai nua-tupatupa ani-vainena adueyei, vivane anelose ai yau 7, ka tau wayahia vita pai nau-yehata ai yau 7. Vitaia vivane pai nau-yehata, iuna avi tuta vitaia ina-iakwa, akanai dewa-yaiyai habuhabui Yaubada ya nua-goyo wayahina ivin'-omo kadu ina-iakwa.

2 Ka aitam amane adueyei ana dune navu gelasi kadu ai ananata ainua nau-tamoia tupwana deina. Ka navu-nana awaniana tomotau imimini-vivinei. Tomotau-naia tau vahi-tau simai-nana ivane-tawanei, ka tauna ya itupwanana ivane-tawanei, ka kadu tauna ana wava a pai ainana iginumina ivane-tawanei. Ka Yaubada pai viam-toutou venei tau nimaia ivo-vi-avini,

---

✧ 14:20: Isa 63:3; SiV 19:15.

<sup>3</sup> e habuhabui Yaubada ya tau paisewa ana wawa Mosese yan' ahe iaheahei, ka kadu aitam ahe Lami-nanaV wayahina iaheahei, ivona,

“Kauvea Yaubada Tau Bagibagi-vainem,  
wamke yam dewa ani-vainena  
kadu pai nua-tupatupa!

Ka yam dewa habuhabuna  
ahiahina kadu tunutunuhina,  
wamke Tuta Habuhabuna ana KiniV. ✧

<sup>4</sup> Koiaka ana pata wamke,  
O Kauvea, wayahim na-vona,  
‘Yauke eha amatauta Yaubada wayahina.’?  
Eha aitam!

Akanai habuhabui am wawa ivo-vi-natei!  
Iuna wamke am heta ahihimata.  
Wayahina, tomotau papani habuhabui  
wayahina  
nau-wawani in'-omo wamke tepama,  
e tauma ina-iwaodu.  
Iuna wamke avaha yam dewa tunutunuhina  
esi-vin'-omanei kadueyei.” ✧

### *Anelose Ai Yau 7 Na Gaebai*

<sup>5</sup> Ka dewaia tanoi iakwa, e adunedune, e Manua Vito-pota wahuma nihenina adueyei, e Yaubada Yan' Awaeha ana Ine am-waei. ✧

<sup>6</sup> Ka Manua Vito-pota-nana wayahina anelose-naia ai yau 7 na vitai pai nau-yehata iomo. Tau ai kwama aitam kaleko ana wawa lineniV, ka kwama-naia hadahadanina kadu vo-vi-namanamanina, babau deina, ka kadu manakadai awaniaia haiona goulaV iweteweteni.

✧ 15:3: NiT 15:1; Sam 139:14; 145:17. ✧ 15:4: Ier 10:6-7; Sam 86:9. ✧ 15:5: NiT 38:21.

<sup>7</sup> Ka aitam vahitau yawayawai na nau-punina wayahia anelose-naia ai yau 7 gaeba goulaV ai yau 7 vene-neiei. Ka dewa-yaiyai Yaubada Tau Ma'-vavaha ya nua-goyo wayahina gaeba-naia nau-vi-anai.

<sup>8</sup> Ka Yaubada didigana kadu ya bagibagi Manua Vito-pota-nana vi-nau-vi-anai, bawa deina. Ka eha aitam koiaka ana pata Manua Vito-pota-nana na-nu a itoava vitaia ai yau 7 pai nau-yehata anelose-naia ai yau 7 wayahia ina-iakwa wayahina. ✧

## 16

### *Yaubada Ya Nua-goyo A Gaeba Ai Yau 7*

<sup>1</sup> Ka movi ananina anononi Manua Vito-pota wayahina vin'-omo, ka anelose-naia ai yau 7 wayahia ivona, “Una-nei, e dewa-yaiyai habuhabui Yaubada ya nua-goyo a gaeba ai yau 7 nihenia una-ito-iwahi tanopia.”

<sup>2</sup> Wayahina, anelose naona ine, e tauna ya gaeba ito-iwahi tano ana heta wayahina tanopia, e gonia ai dune mahi-nununa ka vi-vivih i vin'-omo tau avaha vahitau simai-nana ana wava a pai ainana iginumina iepei wayahia kadu ivin'-omo tau tauna ya itupwana wayahina iaiwaodu wayahia. ✧

<sup>3</sup> Ka anelose v'-inuana tauna ya gaeba ito-iwahi hawana wayahina, e hawana habuhabuna vi-dayaha, ana dune tau mate dayahina deina. Wayahina, dewa habuhabui yawayawai hawana nihenina ianianiga. ✧

✧ **15:8:** 1Ki 8:10-11; 2Va 5:13-14; Isa 6:4. ✧ **16:2:** NiT 9:10; SiV 13:12-17. ✧ **16:3:** NiT 7:17-21.



4 Ka anelose v'-itonuna tauna ya gaeba ito-iwahi daudau itaitaina wayahia kadu tovoha wayahia, e tau kadu ivi-dayaha.

5 Iakwa, e kadu aitam anelose, tauna hawana kadu daudau a tau veimea, movina anononi, ivona, "Yaubada, wamke yam nau-yanahi taina kadu yam vi-nua-dadana taina tunutunuhina ana noe. Wamke ataina emamaei, ka kadu nonova emamaei. Taum Ahihimata, wayahina avaha enau-yanahi deina.

6 Iuna tomotau taina wamke yam tau ekalesia kadu yam tau apa-taputapu inau-vi-anigi, e dayahi ivo-vi-sininia iopu tanopia. Wayahina, tuta ataina wayahina ai nau-pata evenei vivane dayaha ai pai nim. Akanai, ana pata deina."

7 Ka kadu aitam movi anononi pai vi-nomu wayahina omomo, ivona, "Ika! Kauvea Yaubada Tau Bagibagi-vainem, wamke yam nau-yanahi habuhabui ahiahina kadu tunutunuhina." ☆

8 Ka anelose vi-nau-punina tauna ya gaeba ito-iwahi babau wayahina, e babau bagibagi vaniahei, e vi-putu tomotau vanavanai, n'-anai, inini apu-yayai ani-vainena.

9 Ka tau ma' tanopi inini ananai ai ananata wayahina deina. Wayahina, tau yai nua-goyo wayahina Yaubada ana wava iapa-goyogoyoei, iuna tau avaha anamanei tauna vitaia habuhabui tanoi veimeyei. Ka tauna ya nuanua tomotau-naia wayahi vivane tau yai dewa goyona wayahia inua-vinana. Kate Yaubada ya nuanua ivihahaiei, ka eha yai nuanua tauna didigana ivo-vi-nate. ☆

☆ 16:7: Sam 19:9; SiV 15:3. ☆ 16:9: SiV 9:20-21.

10 Ka anelose vi-5-na tauna ya gaeba ito-iwahi vahitau simai-nana ya pai manuena bagibagina wayahina, e tauna ya pai veimea habuhabuna vi-novanovana. Ka tau ma' tanopi viha-naia wayahi meai iauta-vi-anai, ✧

11 ka kadu wahuma a Yaubada iapa-goyogoyoei, iuna yai viha ananina wayahi, ka kadu ai gonía vivivihi wayahi. Yaubada ya nuanua wayahi, e tauí yai dewa goyona wayahia inua-vinana. Kate tauí Yaubada ya nuanua tanoi ivihahaiei.

12 Ka anelose vi-6-na tauna ya gaeba ito-iwahi daudau ananina ana wava Daudau Eupiratesi wayahina, e daudau-nana habuhabuna si-dabani. Dewana vin'-omo, e apaina kiniV tupwai yai papani ponimanea wayahina iomomo yai etawana vo-vi-meani deina. ✧

13 Ka nua gawagawami aitonu adueyei, ai dune kwekwekwe deina. Ka aitam wayahia mwata-nana awana wayahina ni-ubau iopu, ka aitam wayahia simai-nana awana wayahina ni-ubau iopu, ka aitam wayahia tau apa-taputapu vitupu<sup>a</sup> awana wayahina ni-ubau iopu.

14 Ka kwekwekwe-naia vivane Satana yan' anelose goyogoyoi nuai, ka tauí ai pata dewa-bagibagi idedewei, vivane iaiaya deina. Ka tauí iopu ineine tanopi ana kiniV habuhabui wayahia, e ihone-hohoni-neiei Yaubada Tau

---

✧ 16:10: NiT 10:22; Isa 8:21-22. ✧ 16:12: Isa 11:15. <sup>a</sup> 16:13: Tau apa-taputapu vitupu taina vivane vahitau amane-nana v'-inuana, tauna tonana ainua lami tonana deina.

Bagibagi-vavaha yan' auyewa ani-vainena a havia wayahina. ✧

15 Ka Tau Ito-yavuha yana vona deina, ivona, “Udune-vivinimi, ka vona taina unononi ahi-ahina! Apaina yau vin'-omana tau vainau ya vin'-omana deina! Wayahina, aituhu aviyaivia eha iaino-aine, kate aituhu imimini, ka yawai idune-vi-avini ahiahina, ka kadu aituhu ai kwama wayahia imamaei, ka eha nagonegonei ai ini-yauyau wayahia imimini Yaubada matana, akanai tomotau avaha nau-iaiva ivaniahei deina.” ✧

16 Ka kwekwekwe-naia kiniV habuhabui yai yoko nui aitam papani wayahina ihone-hohoni-neiei. Ka papani-nana ana wava me Ebereru movia AramegidoniV. ✧

17 Ka anelose vi-7-na tauna ya gaeba ito-iwahi ana nihenina, e movi ananina anononi Manua Vito-pota nihenina pai manuena ahihi-vaine-nana wayahina omomo, ivona, “Ana pata deina. Avaha iakwa!”

18 Ka vonaina, ka dududui, ka kadu anitana ivin'-omo-nananena, ka kadu yoyoyo ani-vainena si-putuputu. Tuta nonova wayahina tutana Yaubada tomotau vevewanei a itoava tuta-nana wayahina, eha kadu aitam yoyoyo deina, iuna ani-vainena. ✧

19 Ka yoyoyo-nana wayahina meagai-nana ananina am-vewani, ka an' am-vewana papani aitonu wayahia. Ka kadu meagai habuhabui tanopi nihenina papani aitamoata aitamoata

---

✧ **16:14:** SiV 19:19. ✧ **16:15:** Mat 24:43-44; SiV 3:3. ✧ **16:16:** Sek 12:11. ✧ **16:18:** SiV 4:5; 8:5.

wayahia iam-bwegebwegei deina. Ka Yaubada kadu Babiloni Ani-vainena nuani. Wayahina, tauna dewa-yaiyai a wainaV ya nua-goyo wayahina ito-iwahi aitam vei nihenina, e vei-nana Babiloni venei akanai. ☆

<sup>20</sup> Ka bonabona aitamoata aitamoata inovo-tawanei, ka kadu oya habuhabui imaiova. ☆

<sup>21</sup> Ka kadu wahuma wayahina hanu wei toyoina kadu aya-popouna, ka kadu tutumi-vainena atuatuna tomotau hetaia. Ka hanu wei-nana aitamoata aitamoata ya nata ani-vainena, ka aitamoata aitamoata wayahia ana vita vivane 44 kiloV deina. Wayahina, tau ma' tanopi Yaubada iapa-goyogoyoei hanu wei-nana wayahina, iuna vona ahiahina, vita-nana goyo-vainena wayahi. ☆

## 17

### *Vavine Tau Kenekenene*

<sup>1</sup> Ka aitam anelose anelose-naia ai yau 7 na gae-bai ai yau 7 wayahia voneu, ivona, “En'-omoi, e vavine tau kenekenene ai anamana ani-vainena ai dewa-yaiyai aviwavenem. Vavine-nana dau-dau habuhabui hetaia imanuenta. ☆

<sup>2</sup> Ka tanopi ana kiniV habuhabui vavine-nana nui ikenekenene, ka kadu tau ma' tanopi yai nu-anua ivi-kwavakwava vavine-nana yai kenene a wainaV wayahina.” ☆

<sup>3</sup> Ka ya vonana iakwa, e anelose-nana Nuana Ahihinata ya bagibagi wayahina omaneu aitam

---

☆ **16:19:** SiV 14:10. ☆ **16:20:** SiV 6:14. ☆ **16:21:** NiT 9:23-24; SiV 11:19. ☆ **17:1:** Ier 51:12-13. ☆ **17:2:** Isa 23:17; Ier 51:7; SiV 14:8.

papani anata wayahina. Ka tenoke aitam vavine adueyei, ka vavine-nana aitam vahitau amane yabebenina ivi-ata. Ka vahitau amane-nana wagana wava wayahia bwaei, ka wava-naia habuhabui Yaubada iapa-goyogoyoei. Ka vahitau amane-nana unununa ai yau 7, ka tonana ai yau 10. ✧

<sup>4</sup> Ka vavine-nana ai kwama yabebenina kadu yabebenina tupwana nigenigena, aitam kwiniV deina. Ka inini bwaei goulav wayahina, ka hanu vo-vi-namanamani patana ananina wayahia, ka kadu yano wayahia. Ka nimaia vei goulav ivo-vi-avini, ka dewaia gawagawami Yaubada nau-nikonikoiei kadu vavine-nana yai kenene vei-nana nau-vi-anai. ✧

<sup>5</sup> Ka vavine-nana tepaia ai wava iginumi ima-maei, ivona,

“PAI NUA-TUPATUPA,  
BABILONI ANI-VAINENA,  
TAU KENEKENENE HABUHABUI AYOI,  
KADU AVI DEWAIA HABUHABUI  
YAUBADA NAU-NIKONIKOIEI AYOI.”

<sup>6</sup> Ka adueyei vavine-nana tau ekalesia dayahi inimnimi iakwa, e ivi-kwavakwava wayahina. Ka tau ekalesia-naia nonova Iesu ivitumahanei kadu tauna ihaehaeyei. Ka avaha vavine-nana adueyei, nuau vi-tupatupa ananina wayahia. ✧

<sup>7</sup> Wayahina, anelose-nana vi-tanaieu, ivona,  
“Kaiwadi, aviani wayahina nuam vi-tupatupa?  
Yauke vavine-nana a pai nua-tupatupa

---

✧ 17:3: SiV 13:1. ✧ 17:4: Ier 51:7; SiV 18:16. ✧ 17:6: SiV 18:24; 19:2.

avo-vi-mahetem, ka kadu vahitau amane-nana na unununa ai yau 7 ka na tonana ai yau 10 ivi-ata a pai nua-tupatupa avo-vi-mahetem, en'-anamanei. ✧

<sup>8</sup> Vahitau amane-nana edueyei nonova yawayawaina. Tuta ataina wayahina tauna eha ta-mamae. Ka apaina tauna Guba-nana wayahina vane-me na-opu, ka ine tauna a vita-vovona wayahina.

Yawai-vavaha ana Buki vi-putu tanopi a vevewana an' auyewa naona wayahina ka neine a itoava tuta pai nau-yehata wayahina. Ka tau ma' tanopi wayahia aituhu aviyaivia ai wava eha buki-nana nihenina, avi tuta taui vahitau amane-nana idueyei, nuai vi-tupatupa ananina wayahina. Iuna tuta nonova wayahina tauna mamaei, ka tuta ataina wayahina eha ta-mamae, ka tuta tepakaia wayahina na-omo idueyei. ✧

<sup>9</sup> Aituhu aviyaivia yai nuanua vona hivahivana a pai vo-vi-maheta in'-anamanei, tau nau-wawani nua-uya wayahia.

Vahitau amane-nana unununa ai yau 7 vi-vane oyaoyana ai yau 7, ka vavine-nana oyaoyanaia hetaia imanuenta.

<sup>10</sup> Ka unununa vivane kiniV ai yau 7. Tau wayahia ai yau 5 avaha ipeu, aitamoata mamaei, ka pai nau-yehata wayahia eha ta-vin'-omo. Apaina tauna na-omo, ka tauna nau-wawani tuta kutakutana wayahina mamaei.

<sup>11</sup> Ka vahitau amane-nana nonova mamaei, ka ataina eha ta-mamae. Ka tauna vivane kiniV

---

✧ 17:7: SiV 13:1. ✧ 17:8: Dan 12:1; SiV 11:7; 13:7.

vi-8-na. Tauna kiniV ai yau 7 wayahia, ka apaina tauna ine a vita-vovona wayahina.

<sup>12</sup> Ka tonana ai yau 10 edueyei, tau i vivane kiniV ai yau 10. Tuta ataina wayahina tau eha yai pai veimea ita-vaniahe. Kate apaina tau i in'-omo, ka babau aitamoata ana heta nihenina tau i vahitau amane-nana nui pai veimea ivani-ahai kiniV deina. ☆

<sup>13</sup> Tau i yai nuanua aitamoata vivane yai pai veimea iawaehei vahitau amane-nana wayahina ina-ivaitei deina.

<sup>14</sup> Ka habuhabui Lami-nanaV inau-haviei, kate eha ai pata, ka Lami-nanaV vi-peu-neiei. Iuna tauna kauvea yai Kauvea kadu kiniV yai KiniV. Ka avi tomotau tauna honei, ka avi tomotau tauna vi-nua-dadanei, ka avi tomotau yai vitumahana wayahina tauna ivi-muni-waiwaiei, akanai tomotau i habuhabui tauna nui imamaei.”

<sup>15</sup> Ka pai vo-vi-mahetana iakwa, e anelose-nana yana vona wayahiua neine, ivona, “Daudau-naia vavine-nana hetaia imanuenta edueyei vivane tomotau, kadu yoko, kadu papani, ka kadu movi.

<sup>16</sup> Ka apaina, vahitau amane-nana kadu tonana ai yau 10 inau-hohona, e tau kenekenene vavine-nana inau-nikonikoiei. Wayahina, tau i ivi-goyoi, ka vavine-nana ai kwama isi-yehi-yavunei nagonegonei, ka vavine-nana vioi in'-ania, ka aviani itupwa ai ananata nihenina ianai. ☆

<sup>17</sup> Tonana ai yau 10 idedewei deina, iuna Yaubada tauna ya nuanua tau i nuai nihenia

---

☆ **17:12:** Dan 7:7, 24. ☆ **17:16:** SiV 18:8.

boui. Wayahina, tau i yai pai veimea iawaehei vahitau amane-nana wayahina, e tauna veimeyei a itoava Yaubada yan' apa-taputapu habuhabui inau-yehai wayahina.

<sup>18</sup> Ka vavine-nana edueyei vivane meagai ani-vainena. Ka meagai-nana tanopi ana kiniV habuhabui veimeyei.”

## 18

### *Meagai Babiloni Yana Peu*

<sup>1</sup> Ka kadu aitam anelose adueyei wahuma opupuei. Tauna ya bagibagi ananina, ka kadu tauna ana dune a maheta wayahina tanopi habuhabuna tunu-mahetei.

<sup>2</sup> Ka movina ananina vi-hone, ivona,  
 “Ipeu! Ika, Babiloni Ani-vainena avaha ipeu! Ataina meagai-nana avaha vi-pai ma' Satana yan' anelose wayahi, ka vi-pai ma' nua goyogoyoi tunina tunina wayahi, ka kadu vi-pai ma' manua yaveyaveha gawagawami wayahi, ka Yaubada manua-naia habuhabui nau-nikonikoiei. ☆

<sup>3</sup> Iuna meagai Babiloni yai kenene wainaV deina, ka papani habuhabuna tanopi hetana wainaV tanoi inimnim, ivi-kwavakwava. Tanopi ana kiniV Babiloni wayahia ikenekenene, ka tau aimwane habuhabui tanopia ivi-tau kaikai-wabo, iuna Babiloni yai nuanua ananina kaikai-wabo yai gugua ivaniahei, kadu hetana ibou vi-tupanei.”

---

☆ **18:2:** SiV 14:8; Isa 13:21; 34:11-14; Ier 50:39.



<sup>4</sup> Ka kadu aitam movi wahuma wayahina omo, anononi, ivona,

“Itomi yau tomotau, meagai-nana uni-tawanei! Eha yau nuanua Babiloni yai dewa goyona uv'-iune, iuna aituhu aviyaivia dewaia idedewei, apaina kadu tau dewa-yaiyai dewaia wayahi ivaniahei aitamoata. ✧

<sup>5</sup> Vona ahiahina, Babiloni yai dewaia goyo ai yau ani-vainena, ka gwau-nana avaha ivane wahuma deina. Wayahina, Yaubada Babiloni yai dewaia goyona dudueyei, e ai dewa-yaiyai veneveni. ✧

<sup>6</sup> Aviani vavine-nana idedewei, akanai ai nau-pata deina. Ika, avi dewa goyona idewei, akanai vavine-nana ai nau-pata wayahi vivane dewa-yaiyai ainua! Yauke Babiloni ai vei an'-epe, e vei-nana nihenina ai dewa-yaiyai avinevinei, avo-vi-aiaia, avenei, ina-nimi. ✧

<sup>7</sup> Tuta nonova wayahina a itoava tuta ataina wayahina Babiloni yai nuanua didigai kadu gugua kaikaiwaboi, ka ainua igwaugwau. Wayahina, ataina viha kadu pai vi-mohai avenei ai nau-pata. Akanai deina. Vavine-nana nuai nihenina ivona-vanevane ka inuanua, ‘Yauke kwiniV aitam amanuena ka aveimeyei. Ama wava ananina, wayahina adewa-haiawa. Yauke eha wadawadae deina, iuna eha aitam aviani wayahina ana pata avi-mohai.’ ✧

<sup>8</sup> Yai vona-vanevane tanoi anononi. Wayahina, auyewa aitamoata nihenina ai dewa-yaiyai

---

✧ **18:4:** Isa 48:20; Ier 50:8; 51:6, 45; 2Ko 6:17. ✧ **18:5:** Nao 18:20-21; Ier 51:9. ✧ **18:6:** Sam 137:8; Ier 50:15, 29; 2Te 1:6.

✧ **18:7:** Isa 47:7-9.

ava-tawanei, e vavine-nana ivaniahehi, vivane aniga, ka vi-mohai, ka kadu am navovo. Ika, ai ananata ananai, iuna Kauvea Yaubada nau-yanahi, ka tauna ai dewa-yaiyai veimeyei, ka tauna vivane bagibagi-vainena. ✧

<sup>9</sup> Nonova kiniV tanopia imamaei vavine-nana nui ikenekenene, ka Babiloni yai gugua kaikaiwaboi ivo-patai. Ka avaha bawa-nana meagai-nana wayahina vanevane idudueyei, e ivi-putu itoutou ka ivi-mohai wayahi. ✧

<sup>10</sup> Ka kini-naiaV Babiloni ai viha wayahina imatamatauta ananina. Wayahina, meagai-nana wayahina bana mamanaina imimini, imatamatauta, itoutou, ka ivonavona,

‘Aioi! Aioi! O meagai ani-vainemi,  
 O Babiloni, meagai bagibagimi!  
 Babau aitamoata ana heta nihenina  
 wamike ami dewa-yaiyai uvani-  
 aha-kwayavoni!’

<sup>11</sup> Ka kadu tau aimwane tanopia imamaei itoutou ka ivi-mohai Babiloni wayahi, iuna tuta nonova a itoava tuta ataina wayahina, tomotau yai gugua kaikaiwaboi tunina tunina ivi-maiei, kate ataina eha. Ka tau i yai gugua vivane ✧

<sup>12</sup> goulaV, ka silivaV, ka hanu patai ani-vainena, ka yano, ka kwama lineniV, ka tau kaikaiwabo ai kwama yabebenina kadu yabebenina tupwana nigenigena, ka kwama mumuyewina, ka ai tunina tunina patai

---

✧ **18:8:** SiV 17:16. ✧ **18:9:** Ese 26:17; 27:30-35. ✧ **18:11:** Ese 27:36.

ananina, ka gugua tunina tunina tau ai-tai inau-vevewanei vahitau tonai wayahia kadu tau inau-vevewanei ai patai anani wayahia, ka bironeseV, ka kainumu, ka hanu toyoina, ☆

<sup>13</sup> ka ai wagana ana wava kinamoniV, ka naia, ka pai mau dibidibina ana wava muroV, ka pai mau ahiahina ana wava libanosiV, ka wainaV, ka oliveV wetona, ka palaua ahiahina, ka witiV, ka bulumakauV, ka sipiV, ka osiV, ka pai vi-ata taitaina, ka tau paisewa-kavokavovo, kadu tomo-tai ivi-nomui. Guguaia habuhabui tanoi kadu hetaia iaimwanei.

<sup>14</sup> Wayahina, tau aimwane-naia Babiloni wayahi ivonavona,

‘Ua-naia unuanua ananina wayahi avaha imaiova,  
kadu yami gugua kaikaiwaboi  
ka ami dadi habuhabui avaha imaiova.  
Ka eha kadu aitam tuta tepakaia wayahina  
uvaniahe-havine.’

<sup>15</sup> Ka tau aimwane-naia guguaia habuhabui tanoi iaimwanei, ka tau kadu yai gugua kaikaiwaboi ivaniahei yai paisewana wayahina. Ka kadu tau Babiloni ai viha wayahina imatamatauta ananina. Wayahina, bana mamanaina meagai-nana wayahina imimini ka imatamatauta, itoutou, ivi-mohai, ivivi-hone, ka ivonavona, ☆

<sup>16</sup> ‘Aioi! Aioi! O meagai ani-vainemi!

---

☆ **18:12:** Ese 27:12-13, 22. ☆ **18:15:** Ese 27:31, 36.

Nonova ami kwama kwama liniV,  
kwama yabebenina ka tupwana nigenigena,  
kadu kwama yabebenina.

Kadu ami dadi ivo-vi-namanamani  
goulaV wayahina,  
kadu hanu patai ananina wayahia,  
ka yano wayahia! ☆

<sup>17</sup> Ka babau aitamoata ana heta nihenina  
yami gugua kaikaiwaboi habuhabui  
ai vita-vovona ivaniahei!

Ka wae habuhabui ai tau weyaisi, ka wae ai  
tau vi-ata habuhabui, ka wae ai tau paisewa  
habuhabui, ka tau habuhabui hawana wayahina  
ai ma' ivaniahei, tau habuhabui kadu bana ma-  
manaina meagai-nana wayahina imimini. ☆

<sup>18</sup> Ka tau avaha bawa-nana meagai-nana an'  
ananata wayahina idudueyei, akanai ivivi-hone,  
ivonavona,

'Tuta nonova wayahina a itoava tuta ataina  
wayahina,  
avi meagai meagai ani-vainena taina  
deina?  
Eha aitam!' ☆

<sup>19</sup> Wayahina, tau inua-vita, ka apunava  
ununuia ioneonei, ka itoutou, ka ivi-mohai,  
ivivi-hone, ivonavona,

'Aioi! Aioi, O meagai ani-vainemi!  
Itoai habuhabuai yama wa' wayahia

---

☆ **18:16:** SiV 17:4. ☆ **18:17:** Isa 23:14; Ese 27:27-29. ☆ **18:18:**  
Ese 27:32.

avi-tau kaikaiwabo.  
 Iuna wamike yami gugua kaikaiwaboi wayahi!  
 Kate babau aitamoata ana heta nihenina  
 meagaina ipeu iopu,  
 igoyo ananina!

20 Kate itomi tau ma' wahuma habuhabumi  
 nau-wawanimi udewa-haiawa  
 Babiloni ai vita-vovona wayahina!  
 Ika, itomi tau ekalesia,  
 ka itomi tau hae ananimi,  
 ka itomi tau apa-taputapu  
 nau-wawanimi udewa-haiawa!  
 Iuna Yaubada avaha Babiloni nau-yanahi,  
 kadu dewa-yaiyaiei yai dewa goyona  
 itomi wayahimi.” ✧

21 Ka dewaia iakwa, ka aitam anelose bagibag-  
 ina hanu ani-vainena si-nai. Ka hanu-nana ya  
 nata anana deina, ka tauna hanu-nana haponei  
 iopu hawana, e ivona,

“Meagai-nana ani-vainena Babiloni yana peu  
 vivane dewa manimaninina deina!  
 Vona ahiahina, Yaubada meagai-nana  
 na-haponei na-vita-vovoni,  
 ka eha kadu aitam tuta tepakaia wayahina  
 ana pata kavaniahe. ✧

22 Nonova nihenimia ana pata  
 dewa habuhabuna kavaniahei,  
 vivane tomotau yai pai viam-toutou  
 tunina tunina inavinavia kanononi,

---

✧ **18:20:** Isa 44:23; VV 32:43; Ier 51:48. ✧ **18:21:** Ier 51:63-64;  
 Ese 26:21.

ka tomotau habuhabui yai pai viam-toutou  
 tunina tunina bwegigi deina  
 ivaivaini imamaei.  
 Ka nonova tau paisewa tunina tunina  
 nihenimia imamaei ipaipaisewa.  
 Ka tau paisewa tupwai witiV iautei  
 vi-palaua imamaei, ka ana pata  
 taui yai paisewa a nonona kanononi.  
 Kate apaina eha ana pata  
 dewaia habuhabui tanoi  
 nihenimia kavaniahe. ☆  
 23 Ka nonova lampaV ai maheta  
 mahemaheta nihenimia.  
 Ka tau tavine onotona ka tau tavine vavinena  
 yai dewa-haiawa a nonona  
 kanononi nihenimia.  
 Kate apaina eha ana pata  
 dewaia habuhabui tanoi kavaniahe nihen-  
 imia.  
 Ka nonova tau aimwane ai wava anani tanopia  
 imamaei nihenimia ipaipaisewa.  
 Ka wamike yami banauma wayahina  
 tau ma' papani habuhabui unonoi,  
 ueta-naoi ini-panipani. ☆  
 24 Ka tuta nonova wayahina  
 a itoava tuta ataina wayahina,  
 tau vi-meagai meagai-nana nihenina  
 Yaubada ya tomotau  
 inau-vi-anigi-neiei,  
 vivane ya tau apa-taputapu  
 kadu ya tau ekalesia.  
 Ka kadu aituhu aviyaivia ianiga

---

☆ 18:22: Isa 24:8; Ese 26:13. ☆ 18:23: Ier 7:34; 16:9; 25:10.

iuna mani tomotau inau-vi-anigi-neiei,  
 akanai dayahi meagai-nana  
 nihenina mamaei.” ☆

## 19

<sup>1</sup> Ka dewaia habuhabui munia, wahe ananina  
 wahuma anononi, yoko ani-vainena ivivi-hone a  
 nonona deina, ivonavona,

“Aleluia!

Ito-yavuha, ka didiga, ka bagibagi  
           yama          Yaubada          wayahina  
 ima'-vavaha.

<sup>2</sup> Iuna tauna ya nau-yanahi  
 ahiahina kadu tunutunuhina.  
 Wayahina, tauna avaha  
 tau kenekenene vavine-nana  
 ai dewa-yaiyai  
 vi-nua-dadani akanai.

Vavine-nana tau ma' tanopi habuhabui  
 yawai ivi-goyoi yai kenene wayahia.

Ka tauna avaha ya tau paisewa  
 dayahi a nau-pata  
 vavine-nana venei.” ☆

<sup>3</sup> Ka kadu aitam tuta yoko-nana ivi-hone,  
 ivona,

“Aleluia!

Bawa-nana vavine-nana wayahina  
 vanevane-vavaha!”

4 Ka ononotoi anani ai yau 24 kadu vahitau yawayawai na nau-punina ivi-tupa-gum, e habuhabui Yaubada wayahina iaiwaodu. Tauna ya pai manuenta ahihi-vainena hetana manuenta. Ka tau i ivi-hone, ivonavona,

“Ana pata deina!  
Aleluia!”

*Lami-nanaV Ya Tavine Toneina*

5 Ka aitam movi pai manuenta ahihi-vaine-nana wayahina vin'-omo, ivona,

“Itomi yaka Yaubada ya tau paisewa  
tupwami ami wava kikituna,  
kadu tupwami ami wava ananina,  
ka habuhabumi tauna umatamatautei  
akanai.  
Wayahina, habuhabumi nau-wawanimi  
yaka Yaubada un'-awa-davedavei.”

6 Ka kadu aitam wahe ananina anononi, yoko ani-vainena movi deina, ka a nonona daudau ananina taitaina deina o kadi anitana ananina dududui deina. Ka ivi-hone, ivonavona,

“Aleluia!  
Iuna yaka Kauvea Yaubada  
Tau Bagibagi-vavaha  
dewa habuhabuna veimeyei! ☆

7 Itoka nau-wawanika kadewa-haiawa  
kadu didigana kavo-vi-natei!  
Iuna Lami-nanaV ya tavine an' auyewa  
avaha vin'-omo,

---

☆ 19:6: SiV 14:2.



ka awana avaha vo-vi-aiai  
ka vaivani. ✧

<sup>8</sup> Ka vavine-nana avaha ana kwama lineniV  
bigana ka hadahadanina ka mahemaheina  
vaniahei, ka weteni.”

(Ka kwama bigana an' anamana vivane tau  
ekalesia yai dewa tunutunuhina.)

<sup>9</sup> Ka anelose-nana voneu, ivona, “Vona taina  
eginumi. ‘Aituhu aviyaivia didikuna ivaniahei  
Lami-nanaV ya tavine toneina wayahina, akanai  
taui avaha nau-iaiava ivaniahei!’ ”

Ka anelose-nana kadu vona taina ivona, “Vo-  
nana vivane Yaubada yana vona tunutunuhina.”

✧

<sup>10</sup> Ka ya vonana iakwa, e yauke tauna aena  
apeu avi-kabubu, e aiwaodu wayahina. Kate  
tauna dewana vito-potei, e voneu, ivona,

“Eha ena-iwaodu wayahiua! Wamke ka va-  
vaneim itomi Iesu yana hae uvitumahanei toy-  
oina, ka itomi Yaubada ya tau paisewa. Ka  
yauke kadu Yaubada ya tau paisewa aitamoata  
deina. Itoka habuhabuka nau-wawanika  
Yaubada wayahina kana-iwaodu! Iuna Iesu  
yana hae kadu tau apa-taputapu yai hae  
tauna wayahina ainua ivin'-omo nua aita-  
moata wayahina.” ✧

*Osi Kavukavuna Ka Tauna A Tau Vi-ata*

<sup>11</sup> Ka wahuma am-waei adueyei, ka mataua  
osiV kavukavuna mimini adueyei, ka a tau  
vi-ata ivi-wahani Tau Tunutunuhina, ka tauna  
Yaubada vi-ateteyei. Wayahina, nau-wawanika

✧ **19:7:** Isa 61:10; SiV 21:2. ✧ **19:9:** Mat 22:2-3. ✧ **19:10:** Dew  
10:25-26; SiV 22:8-9.

kavitumahanei. Ka tauna dewa tunutunuhina ana noe wayahina tomotau nau-yanahi, ka ai dewa-yaiyai vi-nua-dadani, ka tauna a havia nau-haviei. ☆

<sup>12</sup> Ka matana ai dune ai ananata deina, ka unununa hetana a kunu-nabanaba habuhabui imamaei. Ka kadu ininina wayahina ana wava iginuma mamaei, ka eha kadu aitam koiaka wava-nana t'-anamane, akanai tauna ana heta anamanei. ☆

<sup>13</sup> Ka tauna ana kwama mamanaina weteweteni, ka kwama-nana dayaha nihenina si-utuvi, ka ana wava vivane Yaubada Yana Vona. ☆

<sup>14</sup> Ka wahuma a tau nau-havia ivi-munie, tau kadu yai osiV kavukavui hetana imanuna ivi-ata, ka ai kwama vivane lineniV, ka kavukavuna ka hadahadanina.

<sup>15</sup> Ka tauna awana wayahina inama manimaninina vin'-omo-nananena, ka inamana wayahina tauna tau ma' papani habuhabui vi-peui. Ka nonova aitam apa-taputapu vin'-omo tauna wayahina, ivona,

“Tauna tau ma' tanopi veimeyei,  
ka ya veimea vivane toyoina,  
kainumu deina.”

Yaubada Bagibagi-vavaha nua-goyo dewa goyona wayahi, ka tauna ya nuanua tau goyogoyoi dewa-yaiyaiei ya pai va-buyo nihenina. Ka tauna

---

☆ **19:11:** SiV 1:5; 6:2; Sam 96:13; Isa 11:4. ☆ **19:12:** Dan 10:6; SiV 1:14; 2:17. ☆ **19:13:** Isa 63:1-3; Ioni 1:1, 14.

osi-nanaV kavukavuna vi-ateyei tau pai va-buyo nihenina va-buyoi akanai. ☆

<sup>16</sup> Ka ana kwama mamanaina hetana, ka kadu aya-nununa hetana ana wava iginuma mamaei, vivane

KINI YAI KINI KADU KAUEVA YAI KAUEVA. ☆

<sup>17</sup> Ka aitam anelose adueyei babau nihenina mimini, ka tauna movina ananina wayahina vi-hone manua habuhabui wahuma iyaveyaveha wayahia, ivona,

“Unau-hohona, e Yaubada ya tonei ananina un'-ania. ☆

<sup>18</sup> Ika, tomotau vioi un'-ania, vivane kiniV vioi, ka tau nau-havia ai tau veimea vioi, ka onoto bagibagi vioi. Ka kadu osiV vioi, ka kadu ai tau vi-ata vioi, ka tomotau habuhabui vioi un'-ania, vivane tau ai heta yawai iveimeyei, ka tau paisewa-kavokavovo, tau ai wava kikitui kadu tau ai wava anani.”

<sup>19</sup> Ka vahitau simai-nana, ka kiniV tanopia imamaei yai tau nau-havia nui inau-hohona adueyei. Ka tau yai nuanua osi-nanaV a tau vi-ata ya tau nau-havia nui inau-haviei.

<sup>20</sup> Kate Yaubada ya tau nau-havia vahitau simai-nana ikamoi iyohoni. Ka kadu tau apa-taputapu vitupu-nana ikamoi iyohoni. Nonova tau apa-taputapu vitupu-nana dewa-bagibagi kadu iaiaya dedewei vahitau simai-nana didigana wayahina. Ka tauna iaiaya-naia wayahia tomotau nonoi, iawaehei

---

☆ **19:15:** Sam 2:9; SiV 1:16; 14:20. ☆ **19:16:** SiV 17:14. ☆ **19:17:** Ese 39:17-20.

vahitau simai-nana a pai ainana iginumina ivaniahei, kadu tauna ya itupwana wayahina iaiwaodu. Ka Yaubada ya tau nau-havia vahitau simai-nana kadu ya tau apa-taputapu vitupu-nana ainua yawayawai ihaponei inui navu-nana sulipuraV ananata nihenina. ☆

<sup>21</sup> Ka osi-nanaV a tau vi-ata tauna inamana awana vin'-omo-nananena wayahina kini-naiaV yai tau nau-havia nui nau-vi-anigi-neiei. Ka manua-naia habuhabui iyaveyaveha iomomo, e tau mate-naia vioi ianiania a itoava iam-iaua wayahina.

## 20

### *Ponimana Ai Yau 1000*

<sup>1</sup> Iakwa, e aitam anelose adueyei wahuma opupuei. Ka tauna wayahina Guba-nana an' awa-pota a pai yavuha, ka nimana manawa kainumu ani-vainena vo-vi-avini. ☆

<sup>2</sup> E tauna mwata-nana poy'-avini. Ka mwata-nana vivane Satana, ka tuta nonova wayahina mamaei. Ka anelose-nana mwata-nana yohoni, ka nau-wawani yohoyohonina mamaei a itoava ponimana ai yau 1000 ina-iakwa wayahina. ☆

<sup>3</sup> Ka anelose-nana mwata-nana haponei iopu Guba-nana nihenina, e Guba-nana an' awa-pota gudui, e pai gudu hetana pai ainana boui. Wayahina mwata-nana eha ana pata tau ma' papani habuhabui na-nonoi a itoava ponimanaia ai yau 1000 ina-iakwa wayahina. Ka ponimanaia

---

☆ **19:20:** SiV 13:12-17; 20:10. ☆ **20:1:** SiV 9:1. ☆ **20:2:** Nao 3:1; SiV 12:9.

munia, e Yaubada n'-awaehei anelose-nana Satana na-yavuhi tuta kutakutana wayahina.

<sup>4</sup> Ka pai manuenta ahiahi adueyei, ka hetaia kadu tau vaneneha imanuenta adueyei. Ka Yaubada avaha veimea awaehe-neiei, e tau tomotau inau-yanahi, e ai dewa-yaiyai ivi-nua-dadani. Ka kadu tau ekalesia nuai adueyei. Nonova tau ekalesia-naia Iesu ivitumahanei, ka tauna ihaehaeyei, ka Yaubada yana vona inaunau-waheyeyi. Wayahina, ai havia tanopia magari iaupwaupwa-honoi. Tau ekalesia-naia eha vahitau simai-nana wayahina ita-iwaodu, ka eha tauna ya itupwana wayahina ita-iwaodu, ka eha tauna ana wava a pai ainana iginumina ita-vaniahe tepaia o nimaia. Tai imini-havine, ka Tau Ito-yavuha nui iveimeyeyi ponimanaia ai yau 1000 nihenia. ✧

<sup>5</sup> Mini-havine tanoi vivane mini-havine naona. (Mani tomotau anianigai eha imini-havine a itoava ponimanaia ai yau 1000 ina-iakwa wayahina.)

<sup>6</sup> Aituhu aviyaivia mini-havine naona nihenina imini-havine, tau ahihinata ka avaha nau-iaiava ivaniahei. Aniga v'-inuana eha aitam aviani tau wayahia, iuna tau eha ai pata in'-aniga-havine. Tai avaha ivi-tau vi-nomu Yaubada wayahina kadu Tau Ito-yavuha wayahina, ka Tau Ito-yavuha nui iveimeyeyi ponimanaia ai yau 1000 nihenia. ✧

<sup>7</sup> Ka avaha ponimanaia ai yau 1000 iakwa, anelose-nana Satana tauna ya manua yohona wayahina na-yavuhi.

---

✧ **20:4:** Dan 7:9, 22, 27; 1Ko 6:2; SiV 13:17. ✧ **20:6:** SiV 1:6.

8 Ka Satana na-ni-ubau na-ni-keyekeyei tanopi a papani habuhabui wayahia, vivane papani Goga kadu papani Magoga wayahia. Ka ya nuanua tau ma' tanopi inau-hohoni havia wayahina. Ka tomotau-naia ai yau ani-vainena, magama tania deina. ☆

9 Ka tau nau-havia-naia tanopi ya vi-bababa itutu-honotei ivin'-omo Yaubada ya tau nau-havia yai megeia, e imini-vivinei. Ka Yaubada meagai-nana dune-nuanuaiei, ka Satana ya tau nau-havia nui imini-vivinei. Kate ai ananata wahuma wayahina opu-me, e atuatuna wayahia, e tau nau-havia-naia anata-yehai. ☆

10 Satana tomotau habuhabui nonoi, ka avaha habuhabui ianai-yehai, e Yaubada Satana poy'-avini haponei inu navu-nana sulipuraV ananata nihenina. Navu-nana nihenina vahitau simai-nana kadu tau apa-taputapu vitupu-nana avaha imamaei. Ka navu-nana nihenina viha ani-vainena wayahina ihidahida-vavaha, auyewa kadu ioyoma wayahia. Eha ai pata ivi-yawai. ☆

### *Pai Manuena Ahihi-vainena Kavukavuna*

11 Ka aitam pai manuena ahihi-vainena kavukavuna ani-vainena adueyei, ka kadu tauna hetana manuena adueyei. Ka tanopi kadu wahuma ainua tauna matana inovu-tawanei, kate eha kadu aitam papani ta-mamae ainuai wayahi.

---

☆ 20:8: Ese 38:2, 9, 15-16. ☆ 20:9: 2Ki 1:10. ☆ 20:10: Sam 11:6; SiV 19:20; 21:8.

12 Ka tau anianiga habuhabui adueyei, tau ai wava ananina kadu tau ai wava kikituna, ka pai manuena ahihi-vaine-nana matana imimini.

Ka buki habuhabui iwaei. Ka kadu aitam buki iwaei, vivane Yawai ana Buki. Ka buki-naia ni-henia tau anianiga yai dewa iginumi. Wayahina, tau ai nau-yanahi ivaniahei yai dewaia wayahi.

✧

13 Ka avi tau anianiga hawana nihenina imamaei iomo, ka kadu avi tau anianiga Aniga nihenina imamaei o kadi HadesiV nihenina imamaei iomo. Ka aitamoata aitamoata wayahia nau-yanahi ivaniahei yai dewa wayahi deina. ✧

14 Iakwa, e Yaubada Aniga kadu HadesiV ainua haponei inu Navu-nana Ananata nihenina. Navu-nana Ananata vivane aniga v'-inuana.

15 Ka aituhu aviyaivia eha ai wava Yawai ana Buki nihenina, akanai kadu tau haponei inu Navu-nana Ananata nihenina.

## 21

### *Wahuma Vovouna Kadu Tanopi Vovouna*

1 Ka wahuma vovouna kadu tanopi vovouna adueyei. Iuna wahuma naona kadu tanopi naona avaha imaiova, ka kadu eha aitam hawana ta-mamae. ✧

2 Ka Meagai Ahihinata adueyei, vivane Ierusalem Vovouna, Yaubada wayahina wahuma wayahina opupu-me. Ka meagai-nana avaha

---

✧ **20:12:** Dan 7:9-10; Mat 25:31-46; Dew 17:31; 2Ko 5:10; SiV 13:8.

✧ **20:13:** Rom 2:6; 1Pi 1:17; SiV 2:23; 22:12. ✧ **21:1:** Isa 65:17; 2Pi 3:13.

vaivanei, tau tavine vavinena ivaivanei yana onoto vovouna wayahina deina. ✧

<sup>3</sup> Ka aitam movi a nonona ananina pai manuena ahihi-vaine-nana wayahina vin'-omo anononi, ivona,

“Ataina tuta wayahina Yaubada ya pai ma' tomotau wayahia mamaei. Ka tau'i vivane tauna ya tomotau, ka tauna vivane tau'i yai Yaubada, ka Yaubada-hoina nui ima'-vavaha.

✧

<sup>4</sup> Ka tauna tau'i mata-inui aitamoata aita-moata mataia na-nau-wohi-yavune'i. Eha kadu aitam tuta aniga, o vi-mohai, o toutou, o viha ita-vaniahe, iuna dewaia tutuaina avaha iakwa.”

✧

<sup>5</sup> Ka tauna pai manuena ahihi-vaine-nana wayahina manuena ivona,

“Vevewana habuhabui avevewane-havine'i, vivane vovou!”

Ka ivona,

“Yau vona eginumi, iuna yau vona vivane vona-vavaha kadu vona tunutunuhina.” ✧

<sup>6</sup> E tauna voneu, ivona,

“Ana pata deina! Avaha iakwa. Yauke taua Pai Vi-putu kadu Pai Nau-yehata. Aituhu aviyaivia magari ayaya, akanai daudau awawaehina Yawai A Daudau a tovoha wayahina awaehei inimmim. ✧

<sup>7</sup> Ka aituhu aviyaivia ai vita ivane-tawanei, akanai dewaia habuhabui tanoi ivaniahei, ka

---

✧ **21:2:** Isa 52:1; 61:10; Ebe 11:16; 12:22; SiV 3:12. ✧ **21:3:** Lev 26:11-12; Ese 37:27; Sek 2:10; 2Ko 6:16. ✧ **21:4:** Isa 35:10; 65:19; SiV 7:17. ✧ **21:5:** 2Ko 5:17. ✧ **21:6:** Isa 55:1; Ier 2:13; Ioni 7:37; SiV 1:8, 17; 22:17.



Yauke taua vivane tau i yai Yaubada, ka tau i vivane yauke natunatu. ☆

<sup>8</sup> Kate mani tomotau, tau i eha yai ate-vatu, ka tau i eha ita-vitumahaneu, ka tau i manimanini, ka tau nau-vi-aniga, ka tau kenekenene, ka tau i banauma o nei o pohavu idedewei, ka tau i yaubada vitupu yai itupwana wayahia iaiwaodu, ka tau vitupu habuhabui, aituhi aviyaivia dewaia idedewei, tau i yai pai ma<sup>l</sup> vivane Navu-nana sulipura<sup>V</sup> ananata. Aniga-nana vivane aniga v<sup>l</sup>-inuana.” ☆

### *Meagai Ahihinata*

<sup>9</sup> Ka aitam anelose anelose-naia ai yau 7 na gaebai ai yau 7 na vitai pai nau-yehata ai yau 7 wayahia omo wayahiua, e voneu, ivona,

“En<sup>l</sup>-omoi, e tau tavine vavine aviawenem, vivane Lami-nana<sup>V</sup> ya vavine.”

<sup>10</sup> Ka Nuana Ahihinata ya bagibagi wayahina tauna omaneu avane oya ani-vainena hetana, e Meagai Ahihinata, vivane Ierusalem, wahuma opupu-me Yaubada wayahina viwavenue adueyei. ☆

<sup>11</sup> Ka meagai-nana Yaubada didigana wayahina tapatapa, ka vo-vi-namanamani hanu patai ananina deina, vivane iasipera<sup>V</sup> deinake, ka mahemaheina. ☆

<sup>12</sup> Ka meagai-nana ana gani ani-vainena, vivane badobadona ka mamananaina, ka awai habuhabui ai yau 12, ka awai aitamoata aita-moata a tau dune-vi-avina vivane anelose aitam.

---

☆ **21:7:** 2Sa 7:14; 1Va 17:13; Sam 89:26-27. ☆ **21:8:** Mat 25:41; SiV 20:15; 22:15. ☆ **21:10:** Ese 40:2. ☆ **21:11:** Isa 60:1-2, 19.

Ka awai wayahia me Isiraeli yai dede ai yau 12 ai wava iginumi mamaei. ✧

<sup>13</sup> Gani-nana a tana-vewana na nau-punina. Aitam papani ponimanea, ka awai aitonu imamaei. Ka aitam papani yavanatea, ka awai aitonu imamaei. Ka aitam papani nawanahea, ka awai aitonu imamaei. Ka aitam papani babau a onuonu a papani wayahina, ka awai aitonu imamaei.

<sup>14</sup> Ka meagai-nana an' avutu ai yau 12 imamaei. Ka avutu hetaia Lami-nanaV a tau hae anani ai yau 12 ai wava iginumi imamaei.

<sup>15</sup> Ka anelose-nana ama inua aipuipupu, tauna nimana pai toava goulav vo-vi-avini, e wayahina ya paiseva vivane meagai-nana ana gani kadu an' awa na-ito-viwavei. ✧

<sup>16</sup> Ka meagai-nana ana yona vivane papani na nau-punina, ka a vi-manamana ka a vi-bababa aitamoata. Ka anelose-nana ya pai toava wayahina meagai-nana a vi-manamana ito-pwapwei vivane 2220 kilomitaV deina. Ka kadu a vi-bababa 2220 kilomitaV, ka kadu a vi-manamana hetana 2220 kilomitaV deina.

<sup>17</sup> Ka tauna gani a badobado ito-viwavei, e vaniahei 65 mitaV deina. Pai toava taina vivane tomotau yai pai toava, ka anelose-nana ya pai toava vivane aitamoata deina.

<sup>18</sup> Ka meagai-nana ana gani hanu yabebenina patana ananina ana wava iasiperaV wayahina iyonei. Ka meagai-nana goulata wayahina iyonei, ka goulata vivane mahemaheina. ✧

---

✧ **21:12:** Ese 48:30-35. ✧ **21:15:** Ese 40:3; SiV 11:1. ✧ **21:18:** Isa 54:11-12.

<sup>19</sup> Ka meagai-nana ana gani an' avutu hanu patai ananina tunina tunina wayahina ivaivanei. Avutu naona iasiperaV, ka v'-inuana sapireV, ka v'-itonuna kalikedoniV, ka vi-nau-punina emer-alidaV,

<sup>20</sup> ka avutu vi-5-na saridonikisiV, ka vi-6-na karinelianiV, ka vi-7-na kirisoliteV, ka vi-8-na berilaV, ka avutu vi-9-na topasaV, ka vi-10-na kirisopiraseV, ka vi-11-na iasinitaV, ka vi-12-na ametisitaV. Aitamoata aitamoata wayahia ai dune tunina.

<sup>21</sup> Ka meagai-nana an' awa ai yau 12 yano wayahia ivevewanei. Ka aitamoata aitamoata wayahia vivane yano ananina aitamoata wayahina ivevewanei. Ka meagai-nana etawana ananina goulata wayahina ivevewanei, vivane mahemaheina.

<sup>22</sup> Ka meagai-nana nihenina eha aitam manua vito-pota ata-dueye. Iuna Kauvea Yaubada Bag-ibagi-vavaha kadu Lami-nanaV vivane a manua vito-pota.

<sup>23</sup> Ka meagai-nana eha nau-wawani babau na-vana wayahina o wahava na-tapa wayahina. Iuna a maheta vin'-omo Yaubada didigana mahemaheina wayahina, ka Lami-nanaV vivane meagai-nana a lampaV. ✧

<sup>24</sup> Ka maheta-nana ana pata tau ma' papani habuhabui ivenavenau, ka kiniV tanopia imamaei tau i yai gugua kaikaiwabo ai dune ahiahina iomanei nihenina ibouni. ✧

<sup>25</sup> Ka tuta tuta meagai-nana an' awa waewaei, iuna meagai-nana nihenina ioyoma eha. ✧

---

✧ **21:23:** Isa 60:19-20; SiV 22:5. ✧ **21:24:** Isa 60:3, 5. ✧ **21:25:** Isa 60:11.

<sup>26</sup> Ka aviani tau ma' papani habuhabui iapa-vidovidohei, o aviani didigai vo-vi-natei, akanai guguaia iomaomanei meagai-nana nihenina ibouni, imamaei.

<sup>27</sup> Kate eha aitam aviani gawagawamina ana pata meagai-nana na-nu. Gugua ahihinata ana hetu. Ka aituhu aviyaivia dewa goyona idedewei, tau ini-yauyau ivaniahei dewaia wayahia, o aituhu aviyaivia ivitupu, akanai tau eha ai pata meagai-nana ina-nu.

Kate aituhu aviyaivia ai wawa Yawai ana Buki nihenina imamaei, vivane Lami-nanaV yana buki, akanai tau ai pata meagai-nana nihenina inuinu. ✧

## 22

<sup>1</sup> Ka anelose-nana Yawai A Daudau viwaveneu, daudau-nana mahemaheina, wei deina, ka vi-putu pai manuena ahihi-vaine-nana Yaubada kadu LamiV ainua wayahia, ✧

<sup>2</sup> e meagai-nana a etawana ananina niwanina taitaina opuopu. Ka daudau-nana nepena, ka papani ainua wayahia, yawai an' ai mimini. Ai-nana uaua tuta ai yau 12 wayahia ponimana aitamoata aitamoata nihenina, uaua wahaiva aitamoata aitamoata nihenina. Ka ai-nana yawaina munamuna tau ma' papani habuhabui wayahi, ka aituhu ivi-kwanaha, akanai ai-nana yawaina wayahina ividoaha. ✧

<sup>3</sup> Ka eha aitam bwanata ta-mamae meagai-nana nihenina. Ka pai manuena

---

✧ **21:27:** Isa 52:1; Ese 44:9; 1Ko 6:9-10. ✧ **22:1:** Ese 47:1.

✧ **22:2:** Ese 47:12; Nao 2:9; Sek 14:8; Ioe 3:18.

ahihi-vaine-nana Yaubada kadu LamiV ainua wayahia meagai-nana nihenina mamaei, ka ya tau paisewa tauna iaivaitei.

<sup>4</sup> Ka tau tauna tepana idudueyei, ka tauna ana wava tepaia mamaei. ✧

<sup>5</sup> Ka meagai-nana nihenina ioyoma eha. Ka tau vi-meagai-nana eha nau-wawani lampaV itunu, ka eha nau-wawani babau na-vana, iuna Kauvea Yaubada vivane yai maheta, ka tau yai pai veimea ma-vavaha. ✧

### *Iesu Ya Mavi-havine*

<sup>6</sup> Ka anelose-nana voneu, ivona, “Vona taina vona-vavaha ka vona tunutunuhina. Kauvea vivane tau apa-taputapu nuai yai Yaubada, ka tauna avaha yan' anelose vi-tunei omo wayahima, e anelose-nana dewaia tuta eha ani-hoina na-iakwa wayahina ivin'-omo itomi Kauvea ya tau paisewa viwavenemi, un'-anamanei.” ✧

<sup>7</sup> Ka Iesu ivona, “Udueyei! Tuta eha ani-hoina na-iakwa wayahina, e amavina! Aituhu aviyaivia apa-taputapu-naia buki taina nihenina inua-vi-avini, akanai tau avaha nau-iaiva ivaniahei.” ✧

<sup>8</sup> Yauke Ioni, ka dewaia tanoi habuhabui anononi, kadu adueyei. Ka avaha dewaia anononi kadu adueyei, akanai yauke anelose-nana dewaia viwaveneu aena wayahina avi-tupa-gum, e yau nuanua tauna wayahina ana-iwaodu. ✧

---

✧ **22:4:** Mat 5:8; SiV 3:12. ✧ **22:5:** Dan 7:18, 27; SiV 5:10; 20:6; 21:23, 25. ✧ **22:6:** SiV 1:1. ✧ **22:7:** SiV 1:3. ✧ **22:8:** SiV 19:10.

<sup>9</sup> Kate tauna vito-potau, ka voneu, ivona,  
 “Eha wayahiua ena-iwaodu! Wamke Yaubada  
 ya tau paisewa aitam, ka vavaneim, vivane  
 tau apa-taputapu, tau kadu Yaubada ya tau  
 paisewa. Ka kadu aituhu aviyaivia vonaia  
 buki taina nihenina ivi-ateteyei, akanai tau  
 Yaubada ya tau paisewa. Ka yauke kadu itomi  
 habuhabumi deina. Ika, yauke Yaubada ya  
 tau paisewa aitam. Nau-wawanika Yaubada  
 wayahina kana-iwaodu!”

<sup>10</sup> Ka kadu voneu, ivona,  
 “Eha apa-taputapu-naia buki taina nihenina  
 ehivehive, iuna apa-taputapu-naia tuta eha  
 ani-hoina na-iakwa wayahina in'-omo.

<sup>11</sup> Wayahina, aituhu aviyaivia dewa goyona id-  
 edewei, akanai tuta tepakaia wayahina idedewei  
 aitamoata deina. Ka aituhu aviyaivia dewa  
 gawagawami idedewei, akanai tuta tepakaia  
 wayahina idedewei aitamoata deina. Ka kadu  
 aituhu aviyaivia dewa tunutunuhina idedewei,  
 akanai tuta tepakaia wayahina idedewei aita-  
 moata deina. Ka aituhu aviyaivia ahihinata,  
 akanai tuta tepakaia wayahina ahihinata ima-  
 maei aitamoata deina.” ✧

<sup>12</sup> Wayahina Iesu ivona,  
 “Udune-vivinimi! Tuta eha ani-hoina  
 na-iakwa wayahina amavi-havine! Ka ami  
 nau-pata wayahiua aomanei, ka aitamoata  
 aitamoata wayahimia anau-patami yami  
 dewaia aitamoata deinake. ✧

<sup>13</sup> Yauke Alepa ka Omega, ka dewa  
 habuhabui ai Pai Vi-putu kadu dewa

habuhabui ai Pai Nau-yehata, ka yauke Tau Vi-putu kadu Tau Nau-yehai. ✧

<sup>14</sup> Ka aituhu aviyaivia ai kwama inosia, ivo-vi-aiiaia, akanai yauke Yawai An' Ai uana an'-awaehei in'-aniaia, kadu an'-awaehei meagai-nana an' awa wayahia ina-nu. ✧

<sup>15</sup> Meagai-nana nini-vanina vivane kedewa yai papani. Aituhu aviyaivia banauma o nei o pohavu idedewei, ka aituhu aviyaivia ikenekenene, ka aituhu aviyaivia inau-vi-aniga, ka aituhu aviyaivia yaubada vitupu yai itupwana wayahia iaiwaodu, ka aituhu aviyaivia idewa-haiawa vitupu wayahi o aituhu aviyaivia ivitupu, akanai tau habuhabui nau-wawani meagai-nana nini-vanina imamaei.

<sup>16</sup> Yauke Iesu, ka yau anelose avaha avi-tunei omo wayahimia, e tauna avaha hae-nana itomi tau ekalesia haeyemi.

Yauke Davida Wanohina kadu Davida Nahana. Ka yauke kadu Ubwana mahemaheina ka vo-vi-namanamanu." ✧

<sup>17</sup> Ka Nuana Ahihinata kadu tau tavine vavinena ainua ivona, "En'-omoi!" Ka aituhu aviyaivia vonaia inononi, tau kadue nau-wawani ivona, "En'-omoi!" Ka aituhu aviyaivia magari ayaya, akanai tau nau-wawani in'-omo. Ka aituhu aviyaivia yai nuanua am-venena awawaehina ivaniahei, vivane Yawai A Daudau ina-nimi, akanai tau habuhabui nau-wawani am-venena awawaehina in'-epe. ✧

✧ **22:13:** Isa 44:6; SiV 1:8, 17; 21:6. ✧ **22:14:** Nao 2:9; 3:22.

✧ **22:16:** Yau 24:17; Isa 11:1, 10; Rom 1:3; SiV 2:28; 5:5. ✧ **22:17:** Isa 55:1; SiV 21:6.

*Pai Nau-yehata*

<sup>18</sup> Yauke Ioni, ka yau vona panina taina wayahina tau i habuhabui apa-taputapu-naia buki taina nihenina inononi anau-vi-avini. Aituhu aviyaivia yai vona apa-taputapu-naia wayahia ivi-nuia, akanai apaina Yaubada veimeyei dewa-yaiyai-naia buki taina nihenina ivaniahei. ✧

<sup>19</sup> O aituhu aviyaivia vona tupwai apa-taputapu ana buki taina wayahina iepa-yavunei, apaina Yaubada tau ai vo-pata nau-iaiaavaia kaiiaivei buki taina nihenina n'-epa-tawanei. Ika, tau ai vo-pata yawai an' ai uana wayahina itutu-haini, kadu Yaubada tau vito-potei meagai-nana ahihinata wayahina, eha ai pata ina-nu.

<sup>20</sup> Iesu dewaia tanoi a tau hae, ka tauna ivona, “Ika! Tuta eha ani-hoina na-iakwa wayahina amavi-havine.”

Ana pata deina. Kauvea Iesu, en'-omoi. ✧

<sup>21</sup> Yauke Ioni yau nuanua Yaubada ya tomotau am-venena awawaehina ivaniahei Kauvea Iesu wayahina.

Ana pata deina.

*Yauke Ioni*



**Awaeha Vovouna Minaveha Movia**  
**The New Testament in the Minaveha Language of**  
**Papua New Guinea**  
**Nupela Testamen long tokples Minaveha long Niugini**  
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

---

PDF generated using Haiola and XeLaTeX on 18 Apr 2025 from source files dated 31 Aug 2023

b67aeef-7e9d-566a-9ff5-cb22ab7e2ea4